

Pablo Roma Anoafô Kirika Kenexô Fomani

Pablo Jesús Ifofaafô Roma anoafô kirika kenexô fomani

¹ Roma anoafâfe, ẽ mato kirika kenexô fomai. Ẽkĩa Pablo, ẽ Jesucristo yonoxomis. Niospa ea nĩchini ẽ aõnoa yoimis inõ, ẽfe meka shara Jesúsnoa yoinõ.

² Niospa ẽfe Fake nokoõnoax naiyonõpokoai tãpixõ a Niospa meka yoimisfãfe meka kenenifo. Jesúsnoa meka shara yoinifo. ³ Niospa Fakeõnoa meka shara kenenifo a inõpokoai keskafakĩ. Jesús Niospa Fakekõifiax David ẽfe xini ini. Nã David nõko xinifãfe ẽto xanĩfokõĩ ipaoni. ⁴ Niospa afama mĩshti fatiroxakĩ nõko Ifo Jesucristo otofani. Otofaxõ ato õimani nãmãĩ Niospa Fakekẽ. Niospa ẽfe shinãmã ẽfe Yõshi Sharaõxõ ẽfe Fake otofani. Ato õimani Jesúsmaĩ ẽfe Fakekẽ. ⁵ Jesucristoxõ noko noi. Noko noikĩ ẽfe shinã nõko inãni. Nãskaxõ noko nĩchini Jesúsnoa yoimis nõ inõ. A judeofomari a xoko fetsafori afãferi Jesús chanĩmara fanõfo nõ yoiaino. Jesús chanĩmara fakaxõ nikasharakõinõfo. ⁶ Mãri mã mã Jesucristo chanĩmara faito mato nĩchini mã afe yorafo inõ.

⁷ Roma anoafâfe, ẽ mato kirika kenexô fomai. Niospa mato noixõ mato ifini mato chaka soaxoxiki afe yorafo mã inõ. Mato noikĩ mãto shinã mẽraxõ mato shinãsharamanõ. Epa Nios feta nõko Ifo Jesucristo mato askafanõ.

*Pablo a Jesús chanĩmara faafo Roma anoafo ato
õipaini*

⁸ Ë mato yoinõ. Nikakapo. Keyokõichi a maitio anoafãfe mato yoimisfo, mã Jesús chanĩmara faito õikakĩ. Nãskakẽ, “Aichora,” ã Nios famis. Jesu-cristoxõ, “Aichora,” ã famis. ⁹ Ëfi Nios yonox-okõikai. Chanĩmakõĩ ã yonoxonikai. Ë feparanima. Æfe Fakeõnoa ã meka shara yoimis. Pena tiifi ã mato Nios kĩfixõfafãini. Niospa tãpia. ¹⁰ Ë mato õisharapai. Nãskaxõ ã Nios kĩfifafãini ã mato ano kapaikĩ. Akka ã kai, ã kayamai ã kaima. A Niospa ea nĩchipaiyaino ã katiro. ¹¹ Ë mato õisharapai. Õikaxõ ã mato Niospa meka yoipai. Niospa ãfe Yõshi Sharaõxõ ã mato yoipai mã chanĩmara fakĩ finakõinõ Jesús Ifo sharakõĩ faxiki. ¹² Nãskax Jesúsnoax nõ inima faatanãno. Mã Jesús chanĩmara faino ã inimatiro. Nãskarifiakĩ ã chanĩmara faino mã inimatiro.

¹³ Efe yorafãfe, ã mato tãpimapai mã tãpinõ afeskaxma ã matoki kapai ã katiroma mei, ã kamisma. Mẽ kãta katamis ifiakeranax afara fetsa aki ã kamisma, mato ari kapaifi. Mai fetsa aria ichanãmisfo judeofoma nãfo ã Jesús ato chanĩmara fama. Nãskari fakĩ ã matori askari famapai. ¹⁴ Jesús ea yoia ã ãfe meka keyokõĩ ato yoinõ. Nã kirika kenekĩ tãpiafo ita a kirika kenekĩ tãpiamaforti ã ato yoikai. Nafafoya a nafamaforti ã ato yoitiro. Ë ato yoiaito nikakakĩ Jesús chanĩmara fanõfo. ¹⁵ Nãskari fakĩ ã Jesúsnoa mato Roma anoari yoikapaimis.

¹⁶ Jesúsnoa meka shara yoipaikai ã ranotiroma. Æfe meka xafakĩa shara. Noko Niosnoa tãpimatiro

a tsõa atiroma keskara Niospa atiro. Nõ chanĩmara faito Jesucristoxõ Niospa noko chaka soaxotiro nõ afe ãpaxanõ, nõ fenoyamaino. Taefakĩ judeofãfe nikakõinifo. Akka iskaratĩari judeofomafãferi nikakani afe ipaxakakĩ. ¹⁷ Nã Jesúsnoa meka sharaõxõ Niospa noko õimatiro. Nõ Jesús chanĩmara faito Niospa nõko chaka noko soaxotiro. Nãnori kenenifo iskafakakĩ: “A Jesús chanĩmara fakõinaifo Niospa ãto chaka ato soaxõ afaa chakafamisma keskara ato õi. Nãskax shara ipanakafo Nios fe.”

Keyokõi yorafo chakamisfo

¹⁸ Niospa meka nikakaspafãfe a chakafamisfo Niospa ato õimani ato omiskõimakĩ. Niospa meka chanĩmakõifiano nikakaspakata yora fet-safori ato Niospa meka chanĩmara ato famakaspakani. ¹⁹ Nõko Nios afe keskaramãkĩ tãpipaikĩ nõ tãpitiro. Akka Niospa noko õimamis. ²⁰ Nõ Nios õiyamafixõ nõ tãpitiro Niospa keyokõi onifani, nãmãi Nioskõi ixõ. Nã Niospa onifani õikĩ nõ tãpitiro tsoa fẽtsa keyokõi atiroma. Nios fistichi atiro, afama mĩshti. Nãskakẽ Nios nikakaspafãfe Nios chanĩmara fapaikanima, a onifani õifikakĩ. Nãskakẽ Niospa ato omiskõimani nãfãfe Nios tãpipaikanima. Akka tãpipaikĩ tãpikeranafo. ²¹ A Niospa onifani õifikakĩ iskafakĩ yoipaikanima: “Nios fistichi keyokõi onifani. Aicho, Nios finakõia,” ikaxõ shinãpaikanima. Nãskakaxõ ãto shinã mẽraxõ afara shinãsharakanima. Afara chaka fisti shinãkani ãto õiti fakish keskara ikaxõ. ²² “Nõfi tãpikõiaki,” ifiakaxõ tsõa shinãsharaima. ²³ Niosfi sharakõikĩ shara enenakama. Nãfi

isharapakenakakī. Isharakōifiaito Ifofapaikani-
 ima. Askata yorafo isharayamaino yora fet-
 safāfe afara yora keskara onifakaxō, “Na nōko
 Niosra,” ikaxō kīfimisfo Nioskōi kīfikaspakakī. Yoinā
 keskara onifakaxō, peya keskara onifakaxō, rono
 keskarari onifakaxō, nāskarafo onifakaxō, “Na
 nōko Niosra,” ikaxō kīfimisfo.

²⁴ Askafaifāfe ōikī Niospa anā ato Ifofamaima.
 Nā chakafapaiyaifo fisti akaifāfe ōikī Niospa ato
 xatemanima. Nāskax āa ranā fekaxte faatanākani.
²⁵ Nios fistifi chanīmismaki. Nā chanīyamafimiskē
 tsōa Ifofapaima nā fisti nōko Nios sharakōifiano.
 Niospa keyokōi onifafianino tsōakai Ifofapaima.
 Akka nā Niospa onifanifo, “Nā nōko niosra,”
 ikaxō kīfitaifamisfo. Tsōakai Nioskōi Ifofapaima,
 mēxotaima sharafinakōia ifiamiskē. Nāskakē, “Epa
 Niosi, mī sharafinakōia,” ikaxō yoikani. Aska-
 pakexapainōfora.

²⁶ Askafaifāfe ōikī Niospa ato chaka
 xatexonama, afara chakafapaiyaifo fisti akaifāfe.
 Niospa noko onifani feronāfake yafi kēro, kēro
 feronāfake fe inō. Askafafianino kēro rafe
 fichināpaikani chaka ikani. ²⁷ Askatari feronāfake
 rafe fichināpaikanax chotanākani, kēro tanatama.
 Askax chaka ikanax omiskōikani.

²⁸ Nāskakakī chaka fisti shināpaikani. Anā Nios
 shināpaikanima. Askaifāfe ōikī Niospa ato potai
 nā apaiyai keskara fakī chaka fisti shinānōfo.
²⁹⁻³¹ Chaka fisti feyafakanax chaka shinākani.
 Chaka faatanāi xatekanima. Feronāfakefāfe
 āto āfima fichipaikī chotamisfo. Kērofāferi āto
 fenema fichipaikī chotamamisfo. Nāskaxō
 afara shara āa atonā fisti fipaikani. Fetsafo

chakafakī xatekanima. Fetsafo xītipaimisfo. Yora retemitsamis ita, setemitsamis ita, feratenā faatanāmisfo. Ōitifishkikī feyafamisfo. Ato pārafofāsafamisfo. Ato noikaspamisfāfe fetsafonā fīapaikakī. Ato noikaspamisfo. Chanīmisfo fetsafo pāramisfo. Nios noikaspayanā tsoa noimisfoma. Ichamitsamisfo. Kakapaimisfo, āa kakamepaimisfo. Afara fetsa chaka shināi iskakani: “Afaa chaka fetsa ē afeska faimēti,” ixō shinākani. Āto apa yafi āto afa nikakaspakani. Afara shara shinākanima. A yoiai keskara amisfoma. Āa chanīmisfo. Tsoa noikanima. Ōitifishkikax fetsaki raemisfoma. ³² “Askakanax nakanax omiskōipakenakafo,” ixō Niospa anori yoini. Niospa yoia keskara āto shinā mēraxō tāpifikaxō afara chaka xatemisfoma. Askata fetsafāfe afara chakafaiāfe ōikani atoki inimamisfo.

2

Niospa mēstekōi noko ōixō yoitiro: “Nāto afaa chakafamisma. Akka natori chakafamis,” noko fatiro

¹ Ēfe kaifo judeofāfe, ē mato yoinō. Mā fatorafāfe yoi iskakī: “Na keskara yorafāfe afara chakafaifo omiskōipakenakafo,” ixō mā shināmis. Anori shināfikī māri ato keskarari afara chakafamis. Nāskata, “Nō afaa chakafamisma,” mā itiroma. ² Mā nō tāpia, Niospa ato tāpikōia a yorafāfe chaka shināifo. Nāskakē ato omiskōimaxii. Niospa tāpikōixō chanīmakōi yoi. ³ Mā, “Nato afara chakafara,” ixō māri mā aki. ¿Nāskakī mā shināimē: “Niospa noko omiskōimanima,” ixō? Akka nāskakē ē mato yoi. Niospa matori

omiskōimani mā afara chakafaito. ⁴ Niospa mato noi. Mā chakafafaito mato omiskōimarisafaima. Mato noikikai mato omiskōimapaima. Nāskakē, “¿Nā ē ipaiyai keskara ē iki,” ixō mā shināimē? Askara shināyamakāfe. Niospa mato noikī mato shinā fetsafaxopai mātō chaka mā xatexō āfe meka mā nikasharakōinō. ⁵ Niospa mato shinā fetsafaxopafaito mā nikayospakōi. Mātō ōiti mā kerexfaxō mā Nios nikakaspai. Mākai mātō shinā mā fetsafapaima mātō chaka mā xatexiki. Mā askafiaino iskaratīa Niospa mato omiskōimayoima. Akka mā mai keyoaino mato omiskōimaxii mākairoko mātō chaka xateano. Nā keyokōi yora chakafo ato omiskōimanaitīari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii. ⁶ Nā nō imis keskara Niospa tāpikōia. Nāskax nō naano keyokōi noko kopifaxii mā nōko mai keyoaino. ⁷ Yora fetsafāfe shara shināmisfo a Niospa ato amapaiyai keskara apaikī. Niospa ato inimamatiro. Askatari Nios fe ipaikani. Askara yorafo Nios fe ipanakafo. ⁸ Akka yora fetsafāfe nā apaiyai keskara shinākani. Niospa meka nikakaspakani. Chaka fisti shinākani. Askarafoki Nios atoki ōitifishkixō ato omiskōimani. ⁹ Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax. ¹⁰ Nā Nios chanīmara faafo tii Niospa ato imasharaxii a keskara inōfo. Nāskaxō ato yoixii iskafakī: “Māfi sharaki. Mā ea nikasharakōia. Nāskax mā efe isharapakenaka,” Niospa ato faxii. Nānori judeofo yoixii. A judeofomari ato yoixii

askafakĩ. ¹¹ Niospa õia nãskarafos õi yorafo, a judeofo õita a judeofomari nãskarafos õi.

¹² Akka a Moisés kirika keneni tãpiamato afara chakafaax omiskõipakenaka. Nios fe ipanakama. Askatari a Moisés kirika keneni tãpiato afara chakafaax nãri omiskõipakenaka. Nãnori Moisés kenekĩ yoini: “A afara chakafamisfo omiskõipakenakafo,” ixõ Moisés kirika keneni.

¹³ A Moisés kirika keneni keskara nikafikakĩ nikakaspaifo. Afokai Niospa shara ato õima. Akka nã Moisés kirika keneni keskara nikakõiaifo, “Sharafora,” Niospa ato faxii. ¹⁴ Moisés Niospa meka a judeofoma ato kirika kenexonima. Askafekẽ a Moisés keneni keskara judeofomafãfe tãpiamafikaxõ ãa tãpikõikaxõ shara shinãkani. Nãskakaxõ a Moisés keneni tãpiafo keskara ikafo tãpiamafikanax. ¹⁵ Moisés keneni tãpiamafikaxõ shinãsharaifono fetsafãfe ato õitirofo Moisés keneni keskara Niospa ato shinã mẽra ato shinãmana. Akka sharafakaxõ shinãkakĩ iskafatirofo: “Ë afaa chakafama,” ixõ shinãtirofo. Akka afara chakafaxõ shinãkani iskatirofo: “Oashta, ã afara chakafaa,” ixõ shinãtirofo. Nãskaxõ anã afaa chakafapaikanima. ¹⁶ Niospa nõko õiti mẽraxõ nõ shinãito noko tãpikõia. Jesucristori noko tãpia. Akka yorafãfe nõko õiti mẽraxõ nõ shinãito noko tãpiafoma. Nãskakẽ mã nõko mai keyoaino Niospa noko yoikĩ iskafaxii mãmãi noko tãpixõ: “Nafu sharafo. Akka nafori chakafo,” noko faxii. Nãskara ã yorafo yoimis.

Moisés judeofo Niospa meka kenexoni

¹⁷ Ea nikakapo, efe yorafãfe. ¿Mã shinãkĩ iskafatiromẽ? “Nõrifi nõ judeofoki. Moisés keneni

keskara mā nō tāpia. Nōfi Niospa afe yorafoki,” mā imis. ¹⁸ Moisés kenenioxō Niospa mato amapaiyai keskara mā tāpitiro. Askatari mā asharakōikī mā tāpitiro. ¹⁹ Akka mā shināmis iskafakī: “A Moisés keneni tāpiafoma yora fēxo keskarafo. Nāskakē nō ato tāpimasharatiro āto ōiti xafa shara inōfo, anā fakish keskara inōfoma,” ixō mā shināi. ²⁰ “Nā afara shara tāpiamaforti nō ato tāpimatiro,” mā iki. Nāskatari, “Nā rama tāpiaiforti nō ato yoitirora,” ixō mā shināi. Mā shināi iskafakī: “Mā nō Moisés keneni tāpikōia. Nāskaxō nō ato yoitiro noko chanīmara fanōfo,” ixō mā shināi. ²¹ A Moisés keneni keskara mā ato yoifikī, ¿afeskakīri māri mā nikakōimamē? “Atoki yometsoyamakāfe,” mā ato fafiai māri mā yometsoi. ²² “Māto āfima fe iya-makāfe,” mā ato fafiar māri māto āfima fe mā chotanāmis. Askatari yora fetsafāfe afara onifakaxō, “Na nōko niosra,” famisfo. Askafafiaifono mā ato yoimis: “Anā ano Nios fetsama. Nios fisti. Afara yora faxō, ‘Na nōko niosra,’ fayamakāfe,” mā askafamis. Mā ato askafafiai āto nios kīfiti pexefā mēranoax mā yometsomis. ²³⁻²⁴ Māfi yoikī iskafamis: “A Moisés Niospa meka kirika keneni nō tāpikōia,” nā kakapaimisfo keskara mā imis. Askafafiāxōkai a Moisés keneni keskara mā akama. Mā askayamaito ōikakī judeofomafāfe yoikī iskafamisfo: “Niospa afe yorafo judeofo isharafo. Nāskakē Niosrikai sharama,” ixō yoimisfo. Askafakī matoōxō Nios chakafaifo. Nānori Niospa meka yōra kirika keneni.

²⁵ Moisés judeofo kirika kenexoni iskafakī: “Māto fake feronāfakefo foshki repa xatekāfe mato tāpinōfo mā judeofokē,” ixō Moisés kirika keneni.

Māto fake foshki repa mā xatefixō nā Niospa mato yoini keskara mā nikayamaito Niospa mato ōi judeofoma keskara. Niospa yorafo mā itiroma mā judeofofiax. Nāskarari nā Epa Niospa noko yoini keskara mā ikaito Niospa mato ōi judeokōifo keskara. ²⁶ Judeofoyamafixō Niospa meka nikaifono Niospa judeofo keskara ato ōi afe yorafo keskara. ²⁷ Nā judeofoma foshki repa xateyamafikaxō a Moisés Niospa meka yoikī kirika keneni tāpiyamafikaxō nā Niospa yoini keskara chanīmara fakanax nāskarafofi sharafoki mato keskarama. Akka māfi judeofofixō a Moisés kirika keneni tāpifixō mā nikakōima. Moisés mato Niospa meka yoikī kirika kenexofianino mā nikasharakōima. ²⁸ Māfi judeofo kāinikī. Nāskaxō mā foshki repa xatemis. Akka mā judeofofixō a Niospa yoini keskara mā nikaima. Nāskax mā judeokōifo keskarama. Mā māto feyafatifixō māto chaka mā xatemisma. Nāskaxkai mā Niospa afe yora ikima. ²⁹ Moisés kirika kenekī yoini keskafakī judeofāfe āto fakefo foshki repa xatemisfo ato tāpinōfo judeokōifokē. Akka judeofo atirifāfe Nios shinākanima. Nāfofi judeomakōifo keskara. Nāfokai Niospa afe yorafoma. Akka judeofo atirifāfe Nios shinākani. Nāfofi judeokōifokī. Nāfofi Niospa afe yorafokī. Niospa Yōshi Sharapa noko ōiti fetsafaxōano Nios keskara shara ikafo. A Moisés kirika kenenito noko ōiti fetsafaxotiro. Niospa Yōshi Sharapa noko ōiti fetsafaxotiro. Akka yorafāfe, “Mīfi sharakī,” noko fayamafiaifono Niospa, “Mī sharakī,” noko fai.

3

1-2 ¿Nō judeofoxō nōko fakefo nō foshki repa xatemiskē sharamē? Ēje, shara itiro. Akka nōfi judeofo fake kāiniki. Moisés Niospa meka yoikī noko kirika kenexoni. Nāskakē nō inimai nō judeofo. Efe yora mīshtichi, shinākapo. Epa Niospa nā yorafo tii yoipaiyai keskara nōko kaifo taeyoi ato yoiyoni. Noko tāpimanai keskarari nō yora fetsafori nō ato tāpimanō āfe meka. ³ Akka nōko kaifāfe atirifāfe Niospa meka ifo shara fayamafono akka Niospa a yoiyai keskara amis. ⁴ Yorafo chanīmisfo. Akka Nios ramashara chanīmismo. Yorafāfe keyokōichi noko pārafiaifono akka Niospa noko pāramismo. Nā David Niospa meka yoikī kirika keneni iskafakī:

Niospa āfe meka mēstesharakōi yorafāfe ōinōfo.

A shara shināifo Niospa ato sharafaxōi. Akka a chaka shināifo Niospa ato tāpimakī omiskōimaxii, ixō David yoikī kirika keneni.

⁵ Nios fistifi sharakōiki. Nōkai a keskarama. Nāskakē nō chakafaito yorafāfe ōikakī shinātirofo iskafakakī: “Nios iskarama, Niosfi sharakōikī. Na yorafāfe afara chakafakani. Akka Niospa afaa chakafamismo,” ixō shinātirofo. Nāskaxō Nios sharara fakani. Akka nāskaxō āa yora fētsa shinātiro iskakī: “Ē afara chakafaito ōikakī yorafāfe yoitirofo: ‘Akka Nios iskarama, Nios shara.’ Nāskakē ē chaka shināi yorafāfe Nios sharakōi ōinōfo ea keskarama. Nāskakē Niospa ea omiskōimatiroma ē chakafafiaito,” ixō yora fētsa shara shināima. Nāskara shinākī yōra shināi keskara shināi, Niospa shināi keskara shināima.

⁶ Nios chakama. Nios mēstekōi ika. Akka mēstekōi

iyamaxõ yorafo yoikeranama iskafakĩ: “Nafõ sharakõifoki. Ë ato sharafaxõi. Akka nafõri chakafo. Ë ato omiskõimani,” ixõ Niospa yoikeranama mēstekõi iyamaxõ. ⁷ Yora fētsa āa shināi iskatiro: “Yorafāfe ea yoitirofo ã chanīaito õikakĩ. Iskafakakĩ ea yoitirofo: ‘Mĩ Nios keskarama. Nios chanīmisma. Nios mēstekõi ika,’ ixõ ea yoitirofo. Akka ã chanīaito õikakĩ fetsafāfe, ‘Nios sharakõi, mia keskarama,’ ea faxikani. Nāskakē ã shināitiro iskafakĩ, Niospa ea yoitiro iskafakĩ: ‘Mĩ afara chakafafaito ã mia omiskõimaxima,’ ea Niospa fatiro,” ixõ āa yõra anori shināi. Anori Niospa yoiyamañano āa shināi askatiro. ⁸ Iskafakakĩ yoipaikani: “Nõ afara chakafanõkāfe. Nõ afara chakafaito õikakĩ yorafāfe, ‘Nios sharara,’ fanõfo,” ixõ yoipaikani. “Nā Pablori anori yoimiski nõ afara chakafanõ,” ixõ yoikani. Āa chanīmisfo. Ĕkai anori yoimisma. Epa Nios chanīmisma. Nā keskara yorafo ato omiskõimaxii.

Nõ keyokõichi chakafamis

⁹ “Nõ judeofo sharakõifo. Akka nã judeofoma sharafoma,” ã faima. Askatamaroko ã iskafakĩ yoimis: “Nõfi nã judeofoma õitsa, nāskarafos nõ. Nõ keyokõichi afara chakafamis. Nāskakē Niospa ato yafi noko omiskõimaxii noko tãpimakĩ,” nãnori ã yoimis. ¹⁰ Niospa meka yoikakĩ kirika kenenifo iskafakakĩ:

Tsoa pishtakai nã Niospa yoia keskara famisma. ¹¹ Tsoa pishtakai Nios shināpaikanima. Tsõakai Nios tãpipaisharakanima. ¹² Tsoa pish-takai anã Nios Ifofapaikanima. Afara chaka fisti fapaikani. Afara sharakai tãpiafoma. Tsõa

pishtakai sharafamisma. Fato fistichikai shara Ifofaima. ¹³ Yora naax maiax fepekemeax pisi kãitiro. Nãskarifiakĩ nõko axfapa meka chaka fisti nõ yoimis. Mã nõ ato pãrakĩ feyafamis. Nã rono paekapato noko chachiano nõ paemetiro keskarari nõko meka chakaõnoax omiskõixikani. ¹⁴ Nõ ato fekaxtefapaikĩ meka mitsisipato fisti nõ mekamis. Nõ ato ãchari famis. ¹⁵ Tsoa afayamafeke nõ ato retepaimis. ¹⁶ Nõa kafãsakĩ nõ ato omiskõimafofãsafamis. Nõa nõ ato fekaxtefaafofãsafaki. ¹⁷ Yora fetsafokai nõ ato raefapaimisma ato fe isharaxikima. ¹⁸ Nõko shinã mẽranoaxkai Nioski nõ rateima. Æfe meka nõ nikapaima. Nõko chaka nõ xatepaima, ixõ nãskara yoikĩ kirika kenenifo.

¹⁹ Mã nõ tãpia a Niospa yoia keskara Moisés noko kirika kenexoni. Akka tsõakai Niospa meka nikakõimisfoma. Nãskaxõ tsõa yoitiroma iskakĩ: “Ëfi afaa chakafamismaki. Ë shara imis,” tsoa itiroma. Akka Niospa noko yoitiro iskafakĩ: “Mãri afara chakafamiski,” keyokõi noko fatiro. ²⁰ Nãskakẽ Niospa meka a Moisés noko kenexoni nõ nikapafiaito, Niospa noko yoikĩ iskafatiroma: “Mã shara imiski,” noko fatiroma. Akka tsõa ãfe meka nikasharakõima. Æfe mekaoxõ nõ tãpitiro keyokõichi nõ chakafamisfo.

Jesucristo chanĩmara faax nõ Nios fe ipaxatiro

²¹⁻²² Iskaratĩa Niospa noko afara fetsa tãpimana. Noko xafakĩa õimana afeska faxõ noko imasharatiromãkĩ a keskara shara nõ inõ. Moisés kenenioxõ noko shara imaima. Akka nõ Jesucristo chanĩmara fakẽ Niospa noko shara imatiro Jesúsmãi noko nãxonikẽ

nōko chaka noko soaxoxiki. Nānori Niospa meka Moisés yoikī kirika keneni. Niospa meka yoimisfāferi nānoriri kenenifo. Nā keyokōichi Jesucristo chanīmara faifo Niospa ato shara imai. Judeofo, judeofomafori Niospa shara imatiro Jesús chanīmara faifāfe. ²³ Keyokōichi mā nō chakafamis. Tsoa Nios keskarama. Nios sharakōi. Afaakai chakafamisma. A keskarakai tsoama. ²⁴ Nāskakē Niospa noko noikī nōko chaka noko soaxotiro nō Jesucristo chanīmara faino. Akka Jesucristo nōko chakaōnoax noko nāxoni. Nāskaxō nōko chaka noko soaxoni. Nō afaa kopifatiroma Niospa noko shara imanō. ²⁵ Āfe Fake Jesucristo nīchini āfe imi foax nōōnoax nanō nōko chaka noko soaxoxiki. Nāskaxō Niospa noko omiskōimانيا. Nō Jesús chanīmara faino Niospa nōko chaka noko soaxoni nō shara inō. Nāskaxō nō ōtiro Nios sharakōi. Jesús nayoamano chakafafiaifono Niospa teneyoni. Ato omiskōimayonima Niospamāi tāpixō āfe Fākemāi chipo ato nāxoxiaino Niosmāi mēstekōi ixō. ²⁶ Jesús nōko mai ano oax noko nāxoni. Nāskakē nō chanīmara faito Niospa nōko chaka noko soaxoni noko imasharai. Nāskaxō Niospa noko ōimasharai amāi mēstekōi ixō.

²⁷ Nāskaxō tsōa yoitiroma iskafakī: “Ēfi sharaki, fetsafo keskarama. Nāskax ē Nios fe ipanaka,” ixō tsōakai yoitiroma. Moisés kirika kenekī yoini keskara nikafixō tsōa anori yoitiroma. Jesucristo noko nāxoni nōko chaka noko soaxoxiki nō shināsharanō. Nāskakē nō Jesús chanīmara faino, “Jesús nōko chaka noko soaxoni nō afe ĩpaxanō,” ixō nō yoitiro. ²⁸ Nāskakē anā nō mato yoi. Jesucristo nō chanīmara fakēma a Moisés kirika keneni

keskara nō ifofafiaito nōko chaka noko soaxonima. Akka nō Moisés meka nikaito Niospa, “Mī afara sharafamiski,” noko fatiroma. Akka nō Jesús chanīmara faito, “Mī Jesúsnoax isharakōimis,” noko fatiro.

²⁹ Nāskakēri, ¿Niospa judeofo fisti ato ifitiromē afe yora inōfo? Maa, judeofomafori ato ifitiro Jesús chanīmara faifono afe yora inōfo. ³⁰ Niosfi fistiki. Judeofori, judeofomafāferi Jesús chanīmara fakanax Nios fe nipanakafo ato chaka soaxonano. ³¹ ¿Nō Jesús chanīmara faxō a Moisés kirika keneni nō potatiromē? Maa, nō potatiroma. Jesús chanīmara faxō a Moisés Niospa meka yoikī kirika keneni nikakī nō chanīmara fatiro.

4

Abraham Nios chanīmara fakōini keskara yorafāferi keyokōichi Nios chanīmara fatirofo

¹ Akka nōko xini Abraham ipaoni keskara ē mato yoinō. ² Abraham afara sharafaōxokai Niospa āfe chaka soaxonima. Akka Nios chanīmara faito Niospa āfe chaka soaxoni. “Mī afara sharafaito nāskakē ē mia ifitiro mī efe yora inō,” ixō Niospa anori yoinima. Akka Niospa anori yoiano Abraham yoikerani: “Ē afara sharafaito ea Niospa chaka soaxona,” ixō yoikerani āa kakapaikī. Akka anori Niospa yoinima, nā Niospamāi mā āfe chaka soaxonano chanīmara faito. ³ Niospa meka yoikī Moisés kirika keneni iskafakī: “Abraham Nios chanīmara faito Niospa āfe chaka soaxoni. Nāskakē Niospa yoini iskafakī: ‘Mī afaa chakafamisma keskara ē mia ōi,’ Niospa fani.” Nāskakē Moisés

kirika keneni. ⁴ Akka feronāfāke yora fetsa yonomaxō kori inātiro, kaxpa inātiroma. ⁵ Akka nō afara sharafaōxokai Niospa nōko chaka noko soaxonima, nō afaa chakafamisma keskara noko ōixiki. Askatamaroko nō Jesús chanīmara faito Niospa nōko chaka noko soaxotiro. ⁶ Nāskarari David yoini iskafakī: “Mā Nios chanīmara faito oa afaa chakafamisma keskara Niospa mato ōitiro a Moisés keneni keskara mā nikakōiyamafiaito. Nāskax mā inimatiro.” David anā yoini iskafakī:

⁷⁻⁸ Fatora yora Niospa āfe chaka soaxonano inimatiro Niospamāi ōiaino afaa chakafamisma keskara. Mā Niospa yora āfe chaka soaxō Niospa anā shināchakaima a yōra afara chakafapaoniōnoa. Nāskax yora inimakōitiro Niospamāi mā āfe chaka soaxonano, ixō David yoini kirika kenekī.

⁹ ¿Nā judeofo fisti Niospa āto chaka ato soaxotiomē? Maa, anorima. Judeomafāferi Nios chanīmara faifāfe ato chaka soaxotiro afori inimanōfo. Nāskakē Niospa meka yoimisto kirika keneni iskafakī: “Abraham Nios chanīmara faito Niospa sharakōi ōini,” ixō a Niospa meka yoimisto kirika keneni. ¹⁰ Akka taeyoi Abraham foshki repa xateyoamano Niospa yoini iskafakī: “Mī ea chanīmara fai nā mī afaa chakafamisma keskara ē mia ōi,” Niospa fani. ¹¹ Nios chanīmara faito Niospa Abraham āfe chaka soaxoni afaa chakafamisma keskara ōixiki. Nāskaxō chipo Abraham foshki repa xatenifo fetsafāfe tāpinōfo Nios chanīmara faino. Akka taeyoi Abraham Nios chanīmara fani askayoxoma. Nāskaxō chipo foshki repa xateni. Taefakī Abraham Nios chanīmara

fani Niospa fake ixiki. Nāskano a chipo Nios chanĩmara faifo Abraham āfe fenafo. “Abraham nōko xini ipaoni,” fatirofo. Abraham keskara nō foshki repa xateyamafixō nō Nios chanĩmara faito Niospa noko chaka soaxotiro afaa chakafamisma keskara noko ōixiki. ¹² Abraham askayoxoma Nios chanĩmara fani. Nāskaxō foshki repa xateni. Nā Abraham judeofāfe āto xini ipaoni. Judeofo a Nios chanĩmara faafāfe nāfāfe āto xinikōi Abraham nafāferimāi Nios chanĩmara fakanax.

Niospa noko yoiai keskara noko axōi

¹³ Niospa Abraham yoini: “Ē mia yafi mĩ fenafo keyokōi ě mato mai ināikai,” fani. A Moisés kirika kenei Abraham nikaito Niospa mai inānima. Akka Nios chanĩmara faito Niospa mai ināni. Nāskaxō Abraham Nios chanĩmara faito Niospa āfe chaka soaxoni, afaa chakafamisma keskara shara ōikĩ. ¹⁴ Fetsafāfe anorima shinātirofo iskafakakĩ: “Nō Moisés kirika kenei nikaito Niospa a yoiai keskara noko axotiro. Akka Jesús fisti nō chanĩmara faito Niospa noko axotiroma. Kaxpa nō Jesús shināi,” ixō anorima shinātirofo. Akka nōroko Jesús chanĩmara faito Niospa yoia keskara noko axosharatiro Jesúsmaĩ nōko Ifoxō. ¹⁵ Akka Niospa meka a Moisés yoini keskara nō nikayamaito Niospa noko omiskōimatiro. Akka Niospa noko afaa yoyamanino nō nikayospa ikeranama. Akka iskaratĩa nō nikayospakōifo mā nōmāi Moisés kirika kenei tãpiax.

¹⁶ Taeyoi Niospa Abraham yoyoni Nios chanĩmara faino. Nāskakē Niospa afama mĩshti axoni a yoyoni keskafakĩ. Niospa Abraham afaa yōkanima afama mĩshti axosharaxō. Akka

Abraham ãfe fenafori Niospa ato noikĩ nãskaxõ afama mĩshtiri ato axosharai a yoiyoni keskafakĩ. A Moisés yoini keskara nikakõiaito Niospa afama mĩshti axosharanima. Akka Nios chanĩmara faito Niospa axosharani. Nãskarari a Abraham keskarafo Nios chanĩmara faifori Niospa ato shara faxõ. Akka Abraham nõko xinikĩ nõmã Nios chanĩmara fai Abraham ipaoni keskara. ¹⁷ Niospa Abraham yoini keskafakĩ, yora fẽtsa kirika kenekĩ iskafani: “Nã yora ichapakõifo ãto apa keskarakõ mĩ inõ,” ixõ kirika keneni. Abraham Nios chanĩmara fani. Askaxõ Abraham nõko epa keskara Niospa õi. Niospa nã namisfori anã otofatiro. Nãskaxõ Niospa afama mĩshti onifatiro tsõa õimismafo. Nãskakẽ Abraham Nios chanĩmara fani.

¹⁸ Nãskax Abraham anifokõi ini anã fake atiro-maxakĩ. Nios chanĩmara faito Niospa yoini: “Mĩ chipo fake fixii. Mĩ fenafori ichapa rasi kaixikani,” ixõ Epa Niospa yoini keskara Abraham chanĩmara fani. Nãskax, “Yorafãfe ãto xini mĩ iki,” Niospa fani. ¹⁹ Nãskax Abraham anifokõi ini. Cien xiniya aka. Sara ãfe ãfiri yõxafokõi ini. Anã yõxafoxõ fake fitiroma ini. Nãskafixõ Abraham Nios chanĩmara fani. “Ë anifokõi, ã anã fake fitiroma,” ixõ Abraham shinãnima. “Akka Niospa tsõa atiro ma keskara fatiro,” ixõ Abraham shinãkĩ Nios chanĩmara fani. ²⁰ “Mĩ ãfi Sara fake nanexii,” ixõ Niospa yoini. Niospa nãskara yoiãito nikakĩ Abraham Nios chanĩmara fani. Niospa askafafaino, “Ëfe ãfi yõxafokõia. Anã fake nanetiroma,” ixõ Abraham shinãnima. “Niospa ea yoia keskara ea axotiro. Aicho, Nios fãsi sharakõi,” fani. ²¹ Niospa axõai keskara fakĩ Nios chanĩmara faxõ

Abraham afaa fetsakai shinānima. ²² Nāskakē Niospa yoini: “Mī ea chanīmara fai afaa chakafamisma keskara ē mia ōi,” Niospa fani.

²³ Niospa Abraham askafaniōnoa yōra kirika keneni iskafakī: “Nios chanīmara faifāfe afaa chakafamisfoma keskara Niospa ato ōi,” ixō Abrahamnoa fisti kirika kenenima. A Nios chanīmara faifo Niospa ato ōi afaa chakafamisfoma keskara māmāi āto chaka soafono. ²⁴ Nokori askara kenexoni nō Nios chanīmara faito. “Nōko Ifo Jesús naafiakē Niospa otofani,” nōri chanīmara fakē, afaa chakafamisma keskara Niospa noko ōi. ²⁵ Nōko chakaōnoax Jesús nani nōko chaka noko soaxoxiki. Askata mā otofaano aōnoax afaa chakafamisma keskarafo nō ixii.

5

Nō Nios chanīmara faito afaa chakafamisma keskara Niospa noko ōi

¹ Nōko Ifo Jesucristo nō chanīmara fakē nōko chaka noko soaxonano aōnoax nō Nios fe ishara-pakexatiro. ² Nō Jesús chanīmara faito noko noikī Niosya noko rafemani. Nāskakē, “Ē Nios ikano kaax ē a keskara shara itiro,” ixō nō shināi nō akiki inimakōitiro. ³ Askatari Jesúsnoax omiskōi nōko shinā mēra nō inimakōitiro. Askax nō a keskara nō itiro. Omiskōifaito Jesús āfe shināmā nōko shinā mēra noko mitsisfamaxotiro nō tenenō. ⁴ Akka Jesúsnoax omiskōikī nō tenei nō yora finakōia ipainākafatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe ĩpaxanō. ⁵ Nō askara shināi nō rāfitiroma Niospamāi a yoia keskara noko axōaino. Akka

noko Niospa noikõikĩ ãfe Yõshi Shara nõko shinã mēra noko nanexotiro.

⁶ Akka nõa nõko chaka nõ soametiroma. Nãskakē Niospa ãfe Fake nĩchipaiyaitĩa nai mēraxõ nãmã nĩchini yora chakafoõnoax naaxinõ. ⁷ Tsõakai yora fetsa nãxopaitiroma sharafiano. Ĕtsa, itiro rakikĩa yora nai yora sharafoõnoax. ⁸ Akka nõ chakafokē Niospa ãfe Fake nĩchini noko nãxonõ. Nãskakē nõ tãpitiro Niospa noko noikõiai. ⁹ Askax nõõnoax naano ãfe imi foni. Nõ chanĩmara fakē afaa chakafamisma keskara noko õi noko chaka soaxõ. Akka nõ chakakē Jesús nõõnoax nani. Nãskakē iskaratĩa mã nõ chanĩmara fakĩ finakõia. Anã nokoki Nios õitifishkikĩ noko omiskõimaxima. ¹⁰ Askata nõ Nios noikaspaino ãfe Fãke noko nãxonĩ Nios fe nõ rafenõ. Nãskax nõ iskaratĩa Jesús afe yorafo nõ afe rafekõia. Askaxõ noko sharafakĩ finakõi. Jesús nakē Niospa anã otofani, nõri afe nipaxanõ. ¹¹ Akka nõ Nios noikaspayoni. Iskaratĩa mã nõko Ifo Jesucristoõxõ noko raefaa nõ afe isharakõia. Nãskakē Jesús Nioski noko inima-masharakõia.

Adãõxõ yorafãfe keyokõichi chakafamisfo. Akka Cristo nõko chaka noko soaxotiro

¹² Niospa nã feronãfake Adán taefakĩ onifani. Nã Adán taefakĩ afara chakafani. Nãskakē aõxõ afara chakafapafo. Nã Adán afara chakafaniõnoax keyokõi nõ natiro nõmãĩ keyokõichi afara chakafaax. ¹³⁻¹⁴ Mã Adán afetĩama naniano Moisés Niospa meka yoini kirika kenenĩ afe keskara nõ niimãkai. Akka Niospa Moisés yoiyoamano keyokõichi chakafayopaonifo. Nãskax mã nai keyonifo. Fetsafãfe chakafafiakaxõ Moisés kirika kenenĩ tãpipaonifoma. Askafafiãfãfe oa

afaa chakafamisfoma keskara Niospa ato òini tsòakairoko àfe meka tãpikê. Adán keskarafoma. Adán Niospa meka tãpifiax nikayospani. Nãskaxò Adán chakafakĩ taefani. Nãskarifiakĩ yorafãfe keyokòichi chakafamisfo. Akka nãskax mã nai keyokani, Adánmãi taeyoi nanikê. Nãskarifiiai Cristo oni yora chakafoònoax naiyoi. Nãskakê yorafo aònoax nĩpaxatirofo.

¹⁵ Akka Jesucristo Adán keskarama. Adán Nios nikakaspax nani. Nãskakê nõri aònoax natiro. Akka Jesúsxò Niospa yorafo noikòikĩ ato imasharapakenaka afaa chakafamisma keskaramãi ato òikĩ. Akka nã Adán nai taeni afara chakafaax. Nãskax yorafo Adánnoax nãpanakafo. Akka Jesús Ifofakanax Jesús fistiònoax keyokòishi sharapakenakafo. Jesúsxò Niospa ato raefatiro a chanĩmara faafo tii. ¹⁶ Adán afara chakafaniònoax yorafo nai keyotirofo. Nãskatari àto chakaònoaxri nai keyotirofo. Akka nõ keyokòichi chakafakê Niospa noko omiskòimatiro. Nã Adán ani keskarakai Cristo afaa chakafamisma. Mã nõ keyokòichi afara chakafamiskê Jesucristoòxò Niospa noko noikĩ nõko chaka noko soaxotiro afaa chakafamisma keskara noko òikĩ. Omiskòitamaroko nõ afe isharapakexanò. ¹⁷ Adán àfe chakafoònoax keyokòinakani. Akka Cristo fisti nokoònoax nani nõ aònoax Nios fe nĩpaxanò Niospamãi noko shara òiaito. Jesucristoòxò Niospa noko noixò noko nimapakenaka. Nãskakê noko askafaxòkĩ Jesús Adán finòkòia.

¹⁸ Nãskakê ã mato yoiai keskara nã feronãfake Adán àfe chakaòxò keyokòishi Niospa noko omiskòimani. Akka Jesúskaiafaa chakafamisma.

Nāskakē nā chanīmara faafo tii Nios fe nīpanakafo. Nāskakē nā afaa chakafamisma keskara Niospa ato imai. ¹⁹ Akka nā feronāfake Adán Nios nikakaspakī taefani. Nāskax Adán nikayospakōi taeyoi ini. Keyokōichi aōxō nō chakafapamis. Akka nā Cristo fistichi ares Nios nikakōimis. Afaakai chakafamisma. Nāskakē nā chanīmara faafo tii aōnoax afaa chakafamisma keskarafo ipanakafo.

²⁰ Moisés Niospa meka yoikī ato kirika kenexoni afara chakaōnoa tāpinōfo. Akka nā Moisés ato kenexoni mā ōifikakī a Niospa ato yoia keskara tsōa nikakōikani. Keyokōichi afara chakafamisfo. Mā chakafakī finafafono Niospa ato noisharakōixō āfe Fake atoki nīchini ato chaka soaxonō. ²¹ Afara chaka fisti shinākani namisfo. Akka Niospa noko noikōia. Nāskakē āfe Fake Jesús noko nāxoni nōko chaka noko soaxoxiki. Nāskakē nō Jesús chanīmara faito Niospa afaa chakafamisma keskara noko ōi. Noko chaka soaxonano nō afe ipanaka.

6

Cristo nia keskara nōri afe nīpatiro

¹ Akka yorafāfe atirito shinākakī iskakani: “Nō afara mēxotaima chakafafiaino Epa Niospa noko noikī nōko chaka noko soaxotiro. ¿Nāskakē nō afara chakafa fafafaītiro,” ixō anori shinākani sharamē? Maa, sharama. ² Nāskakē afara chaka shināyamakāfe. Nō Jesús chanīmara faxō mā nōko chaka nō pota. A nō ipaoni keskara nō anā shināpaima. ³⁻⁴ Mā mā tāpia noko maotisafani nō fetsafo ōimanō. Nāskax nō a Jesús fe naa keskara nō chaka ipaoni keskara anā shināima. Nāskakē nōko

chaka soapaikĩ nõ Jesús chanĩmara faino noko maotisafani. Jesús nokoõnoax naano maifanifo. Nãskax nõ afe naa keskarax nõri maia keskara. Akka Jesús naax otoiñakafata Apa ari kani. Nõri nono mai anoax Jesúsnoax ari nõ katiro. Askaxõ Apa Niospa mã Jesús otofaxõ noko õimani nãatomã afama mĩshti fatiroxakĩ. Nõko õiti noko fetsafaano a nõ ipaoni keskara nõ anã itiroma, a keskara sharakõi nõ ipai.

⁵ Cristo nõkoõnoax nani. Nã nõ chanĩmara faax nõ afe rafetiro. Nãskakẽ Jesucristo nakẽ Apa Niospa otofani keskakakĩri anã otofatiro, a keskara shara nõ inõ. ⁶ Jesús mastanifo nõko chaka noko soaxonõ. Nõri Jesús fe masta keskarakõi anã chakafapaima. Nãskarifiã nõ Jesús Ifofaax nõ afe naa keskara. Nãskaxõ nõ anã chaka shinãima. Afara chakafo nõko ifoma. ⁷ Akka yõra nãxokai anã chaka shinãtiroma. Nãskarifiã nõri chaka shinãtiroma afara chakakairoko nõko ifokẽ.

⁸ Nõ Cristo fe naa keskaraxõ nõ Jesús chanĩmara faax nõ afe isharapakenaka nãmãi nõ chanĩmara faax. ⁹ Mã nõ tãpia Cristo mã nafiano Niospa otofani. Nãskax anã natiroma. Anãkai afeskax Cristo natiroma. ¹⁰ Akka nai fistinixakĩ nõko chaka noko soaxoni anã afara chaka nõko ifo inõma. Nãskakẽ iskaratĩã Cristo mã nia. Nãskaxõ mã Niospa apaiyai keskakai.

¹¹ Mãri Cristo fe naa keskara. Nãskakẽ iskaratĩã mã shinãtiro iskakĩ: “Ë chaka ipaoni keskara anã shinãpaima. Nãskax ã iskaratĩã Jesucristoõnoax Epa Nios fe rafe kakaini ea amapaiyai keskara axiki,” ixõ anori shinãkãfe. ¹² Nãskaxõ afara chaka anã ifofayamakãfe afara chaka mato famapai kiki a keskara mã anõma. ¹³ Nãskax Niosnoax isharakãfe. Afara chaka mato famapaiãito nikayamakãfe.

Afara chakafamis iyamakãfe. Nios Ifofakãfe mato sharafanõ. Iskafakãfe: “Nios ãfe Ifokõixõ ea amapaia keskara ã aki sharafakĩ.” ¹⁴ Akka anã afara chakapa mato afeska fatiroma. Afara chaka anã mãto Ifo itiro ma mã Cristo chanĩmara faano. Epa Niospa mato noikĩ ares fisti mato ifitiro mã afe ipaxanõ. Akka nã Moisés kirika kenenionoxkai mã Nios fe ipaxatiroma.

Epa Niospa mato amapaiyai keskara mã nikakõiyana mã yonoxokõitiro

¹⁵ Moisés yoini keskara nõ nikaito Epa Niospa noko nimasharaima. Akka Cristo nõ chanĩmara faito noko noikĩ noko nimasharatiro. Nã fisti nõko Ifo itiro noko chaka soaxonano. Nãskatari, ¿nõ afara chakafa fafafaĩtiromẽ Niospa noko noikĩ nõko chaka soaxonõ? Maa, nõ afaa chakafatiroma. ¹⁶ Mã tãpia ãfe yonomatixõ mãto ifo nikakõiyana mã yonoxotiro. Nãskarifiakĩ mã katotiro fatomãkĩ mãto Ifo. Epa Nios mã nikakõitiro ãfe yonomati ixii, askayamai chaka mã katoax mã ãfe yonomati mã itiro. Chaka katoax mã naax mã omiskõixii, mã Nios fe nipanakama. Askatamaroko Epa Nios nikakõiax mã afe isharapakenaka. ¹⁷ Mã afara chaka ifofaax ãfe yonomati mã ipaoni. Akka iskaratĩa mã mã Epa Nios Ifofaa. Mato yoimis keskara mãto shinã mẽraxõ mã nikakõimis. ¡Aicho! Mã mã Epa Nios Ifofaano mato nimasharamis. ¹⁸ Nãskakẽkai afara chaka anã mãto ifo itiro ma anã mato yonomatiroma. Akka iskaratĩa afara shara fisti mãto ifo itiro. Mãfi ãfe inakõifoki. ¹⁹ Ë mato meka fekax yoima, mãto ifoõnoa ã mato yoinõ mã tãpisharakõinõ. Chaka fetsa fetsatapafo

māto ifo ipaoni. Nāskaxō mā afara chakafakī finakōipaoni. Akka iskaratīa Epa Niospa āfe inafō, mā. Anā afara chakafayamakāfe afara shara fisti māto ifo inō.

²⁰ Taeyoi afara chaka māto ifo ipaoni. Nāskakē afara shara mā shināpaonima māto ifo ipanā. ²¹ ¿Mā ipaoni keskara sharamē? ¿Mato imasharapaonimē? Maa, a nō ipaoni keskarakai anā afokai nō shināpaima. Afo nō shināi nō rāfitiro. Nā chakafo xateyamax nā nō naitīa nā omiskōipakenakafo mēra nō katiro. ²² Nāskakē iskaratīa afara chaka anā māto ifoma. Epa Nios māto Ifo. Māfi āfe yonomatifoki. Mā āfe yonomatifokē mato sharafa fafāfāini a keskara shara mā inō mā afe ĩpaxanō. ²³ Nā afara chaka nōko ifono, ¿afanā noko kopifaimē? Akka aōnoax nō naax nō omiskōipakenaka. Akka Jesucristo nō Ifofaino Epa Niospa noko afaa kopi yōkaima nō afe nipaxanō.

7

Nō anā chaka ifofaxoma nō Cristo Ifofatiro

¹ Efe yorafāfe, mā mā tāpia nōko xanīfokōichi noko yoia keskara nō nikatiro. Nō niyoxō nō nikatiro. Akka mā nō naxō nō anā nikatiroma. ² Nāskarīfiai kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka. ³ Akka fene niyoanokai kēromā fene eneta fetsa fe fianātiroma. Askarafi chakakī. Chota feroma itiro. Akka fene naano kēro feronāfake fetsa fe fianā askara shara, ixō Moisés kēneni.

⁴ Akka mā fenē naxō anā āfe āfi yonomatiroma. Nāskarifiakī mā Cristo fe naa keskarax a Moisés kirika keneni anā mā nikatiroma. Akka mā Cristo fe naa keskarax mā yora fena sharakōi itiro Cristo mātō Ifono. Mā Cristo naax otoiñākafanax Nios fe ipanaka. Nāskaxō afara shara mato amatiro mā Nios yonoxonō. ⁵ Nō Cristo Ifofamatai afara chaka fetsa fetsatapafo nō ayopaoni. Moisés keneni keskara atama nō chaka fisti shināpaipaoni. Nā chakaōnoax nō naxii. ⁶ Cristo noko nāxoni nōko chaka noko soaxoxiki nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarax nō yora fena shara iki. Afara chaka anā nōko ifoma. Askatamaroko āfe Yōshi Sharaōxō Niospa noko amapayai keskara noko amatiro. A fisti nō Ifofai, a Moisés keneni keskara ifofayopaonixaki anā nō ifofatiroma.

Moisés kenenixō nō tāpia nō chakafamis

⁷ Iskafakī shināyamakāfe. A Moisés noko kenexoni, chakara fayamakāfe. Akka Moisés Niospa yoini keskara keneyamanikēkai nō chakafamis nō tāpikeranama. Moisés keneni iskafakī: “Yora fetsanā afara fīapayamakāfe. Nō yora fetsanā fīapaikī nō chakafai,” Moisés anori keneyamanikē nō tāpikeranama. ⁸ Moisés anori keneni tāpifixō nōko ōiti chakakōikē nō shināsharaima. Nōkonāyamafekē nō fichipaimis. Afara chakafori nō fichipai. Akka Moisés Niospa meka keneyamanikēkai nō nikayospa ikeranama. ⁹ Niospa meka tāpixoma afara chakafafiakī nō shināma. Askata chipo nō āfe meka tāpifixō nō akama a noko yoia keskara. Nāskafaxō āfe mekaōxō a nō afara chakafamis nō

tāpitiro. ¹⁰ Niospa yoia keskara akax nō nipaxatiro. Niospa yoiai keskara nō akima mā tāpifiax, askax nō omiskōi. “Moisés keneni keskara ayamax nō natiro,” ixō nō shināmis. ¹¹ “Epa Niospa noko yoia keskara nō aki. Nāskai nō Nios fe nipanaka,” ixō nō shināfikī nō afara chakafakī nō xateama. Akka chakapa noko pārai. Nāskakē nō tāpia nōko chakaōnoax nō omiskōi nō Nios fe nīpanakama.

¹² Moisés keneni keskara sharakōi nāmāi Niospa meka. Niospa meka mēstekōi, chanīmakōi. ¹³ A Moisés keneni sharafianokai a keneni keskara nō nikasharamisma. Moisés kenenioxō nō tāpitiro nō chakafamis. Moisés keneni ōifikī, ¿afeskafaxō nōko chaka nō potatiromē? Nāskax nō naax nō omiskōipakenaka. ¿Moisés keneniōnoax nō omiskōipakenakamē? Maa, askarama. Akka nō Nios nikaspax nō omiskōipakenaka. A Moisés keneni sharakōi, Niospa meka. Moisés keneniōxō nō tāpia nō nikayospakōi. Nō Niospa meka nikakōimisma. Nāskax nō chakakōi.

Nōakōi nōko chaka xatepaifikī nōko shinā mēraxō nō xatetiroma. Nōko shinā mēra chakakōi

¹⁴ A Moisés Niospa Yōshi Sharapa shināmanaino noko kenexoni. Niospa meka nō shināyamai nō sharama. Afara chakafi nōko ifokī nō āfe yonomati. ¹⁵ ¿Afeskai nō iskamismē? Nōkai tāpīama. Nō sharafapaiyai keskara nō akima. Akka nō akaspafiakī nō aki. ¹⁶ Moisés keneni keskara nō nikapai, “Nā meka shara,” shinākī. Askara shināfiki nō akima. Nā afara chakafapaiyamafikī nō aki. ¹⁷ Nōakai nō afara chakafapaima. Akka nōko shināmā nō shinākī nō afara chakafamis. Afara sharafapaifikī nō shināsharaima, nōko shinā

mēramāi chakakōikē. ¹⁸ Mā nō tāpia nōko shinā mēra sharama. Isharapaifi nō itiroma. ¹⁹ Akka a nō akai keskara sharama. Nā sharafapaifikī nō amisma. Nā afara chakafapaiyamafikī nāskara nō amis. ²⁰ Nāskakī a nō akaspai nō aki. Nōakōi nō afara chakafapaima. Nō chaka potapaifikī nō potatiroma nōko shinā mēramāi chakakōikē. ²¹ Akka nō askamiski. Nō sharafapaifiaito nōko shinā mēraxō afara chakapa noko fakirira shināmapai nō shara shinānōma. Nō keyokōi askamis.

²²⁻²³ Nōa nō iskafai: “Aicho. Niospa noko yoiai keskara shara,” ixō nō shināfi nō nikayospamis afara chakapamāi noko fekaxtefaito. Niospa meka nō tāpifiax nō nikayospamis. Nōa nō sharafapaiyai keskara nō atiroma. Nō chaka xate-tiroma. ²⁴ Nāskakēkai ē inimaima. Ē shināchakai. Ēfi feronāfake chakakī. Ē inimaima. Ēfe shinā mēraxō ē afara chakafaax ē omiskōixii. Ooa. ¿Tsōa nō Ifofatiromē nōko Ifokōi inō, afara chaka anā nōko ifo inōma? ²⁵ Aicho Epa Nios. Ēfe Ifokōi Jesucristoōxō ēfe chaka ē xatetiroki. Iskaratīa ē tāpia Niospa meka nō ifofapaifikī afeska faxō nōa nō atiroma nōko shinā mēramāi chakakē. Akka Jesucristoōxō nō atiro.

8

Niospa Yōshi Sharaōnoax nō ika

¹ Akka Jesucristo nōko Ifono nō afe yora. Nāskakē Epa Niospa noko yoima iskafakī: “Mā chaka. Ē mato omiskōimanō. Emakinoax fotakāfe omiskōipakenakafo mēra nānoax mā omiskōipakenaka,” ixō noko yoipakenakama

māmāi nōko chaka noko soaxō, ² Jesucristoōxō Niospa āfe Yōshi Sharapa noko nimasharai anā chaka nōko ifo inōma, nō omiskōipakexanōma. ³ Moisés yoini keskara nō tāpifiano aato noko imasharatiroma nōko chaka noko soaxotiroma. Akka Epa Niospa shināyoni āfe Fake nai mēraxō mai ano nīchixiki ari noko keskara yora inō. Noko keskarafaxokai nō amis keskara afaa chakafamisma. Akka noko nāxoni anā afara chaka nōko ifo inōma. ⁴ Nāskata iskaratīa nō Niospa Yōshi Shara Ifofaax aōxō Moisés yoini keskara nō nikatiro. Nō Niospa meka ifofasharakōitiro.

⁵ Akka nō chaka xateyamano afara chakapa noko amapaiyai keskara fisti nō atiro. Akka Niospa Yōshi Sharapa noko īkināno nā noko amapaiyai keskara fisti nō atiro. ⁶ Nā apaiyaifo keskara fisti shinākanax afo nakanax anā otokanax omiskōipakenakafo. Nios fe ipanakafoma. Akka Niospa Yōshi Shara ato mēra naneano nā apaiyai keskara Niospa Yōshi Sharaōxō atirofo. Nāskax isharapakenakafo shināsharakata. ⁷ Fetsafāfe Nios noikaspakani Niospa ato yoia keskara nikapaikania. Āto shinā mēraxō afara chaka fisti shinākani. Nāskaxō Niospa ato yoia keskara nikatirofoma. ⁸ Nā āto shināmā shināifo keskara fisti shinākakī Niospa ato amapaiyai keskara atirofoma. Afara chaka ifofaifono Nios atoki inimaima.

⁹ Akka mākai askarama. Māto shinā mēraxō afara chakapa mato shināmanima. Akka Niospa Yōshi Shara māto shinā mēra nanexō mato shināmasharamis. Akka Niospa Yōshi Shara māto shinā mēra naneyamaino mā Cristo fe rafetiroma.

¹⁰ Cristo mato fe rafefiaino afara chakaõnoax mato yora nai. Mato yora nafiano mato fero mēsho naima Nios fe nipanaka Niospamāi afaa chakafamisma keskara mato õiaino. ¹¹ Mā Jesús naano Niospa otofani. Nāato āfe Yōshi Shara mato shinā mēra nanea. Nāskarifiakī mato yora naano āfe Yōshi Sharaõxõ Niospa anā mato otofatiro mato yora fenasharakõi inõ.

¹² Efe yora mīshtichi, Niospa Yōshi Shara nofe rafeaino Epa Niosnoa nō shinātiro noko amapayai keskara akī. A nō afara chakafamiskai anā nō shināpaitiroma noko Niospa amapayai keskara akī. ¹³ Akka a nō apaiyaifo keskara fisti shināx nō omiskõipakenaka nai. Akka nāskafixõ Niospa Yōshi Sharaõxõ afara chakafakī nō xatexõ anā chaka nō shinātiro. Nō Epa Nios fe nisharapakenaka.

¹⁴ Niospa Yōshi Sharapa noko shināmanaino nō Niospa fakefo iki. ¹⁵ Āfe Yōshi Sharapa noko shināmasharapai nō anā mesenõma. Mā nõfi Niospa Yōshi Shara fiaki. Nā āfe Yōshi Sharaõxõ āfe fakefo noko ima. Aõxõ nō yoitiro iskafakī: “Epa Nios, mī ēfe Epa,” ixõ nō yoitiro. ¹⁶ Nõko shinā mēraxõ Niospa Yōshi Sharapa noko yoi iskafakī: “Mī Epa Niospa Fakekõi,” ixõ noko yoi. ¹⁷ Nõ Niospa fakekē nā noko yoia keskara noko inātiro. Nõfi nō Niospa fakekē nā āfe Fake Cristo ani keskara nokori inātiro. Nõõnoax omiskõifinixakī iskaratīa nai mēranoax Apa Nios fe xanīfokõi. Nāskarifiāi nõri aõnoax omiskõiax nō nai mēra Epa Nios ano nokoano noko sharafinakõia imaxii nõ afe ishara-pakexanõ, a keskara shara nō inõ. Akka afe yorafa Niospa ato sharafaxõi nāfomāi āfe fakefokē.

Niospa fakefo Jesús fe ishara-pakenakafo

18 Nõ iskaratīa omiskōiyofiax nõ chipo Jesús fe isharapakenaka. A keskara sharafinakōi noko imai. Tsōa õimisma keskara sharafo noko õimaxii. A nõ omiskōipaoni anā nõ shināima. 19 Epa Niospa āfe fakefo otofaxii a keskara sharakōi ato imaxii. Akka nā Niospa onifanifāfe manakani õisharapaikōikakī afe keskarrafo ato imaimākai. 20-21 Niospa āfe fakefo sharakōi ato õimaxii. Nāskatari a onifanifori sharakōi ixii. Anā afaa chaka ixiima. Afarāfo anā payokomepakenakama. Akka iskaratīa nā Niospa onifanifo payokomepakenakafo askayamapaifiafono. Nāskaxõ Niospa yoini: “Adán afara chakafaõnoax keyokōi payokomepakenaka.” Akka Niospa āfe fakekōifo akiki nokoafono ato yora fetsafaxoxii anā payokomenõfoma, afara chakafāfe ato fekaxtefanõma. Nāskarifiai Niospa onifanifori nā Niospa fakekōifo keskara shara ixii, anā payokomepakenakama.

22 Kēromā fake kākī pae meytiro. Mā kākõ anā pae metiroma. Nāskarifiai a Niospa onifanifo omiskōiyokani. Akka mā Niospa ato fetsafaano anā omiskōixikanima. 23 Akka nõ Niospa fakefo āfe Yōshi Shara nofe rafeaino nõ tāpitiro nõ Nios ikano kaax nõ isharakōixii. Akka iskaratīa nõ isinī iki fekaxtei. Nāskakē nõ manasharai Epa Nios ika ano noko ifinõ nõ āfe fakefokē a keskara shara noko imanõ. Nāskatari nõko yora fena sharakōi noko imai anā nõ isinī inakama. Anākai nõ nanakama. 24-25 Nāskara nõ shināi nõ akiki nokoaito noko fetsafaxii a keskara shara nõ inõ. Nāskax nõ afe ipanaka. Chanīmara faxõ inimayanā nõ manasharatiro fena fenakima nā nõ akiki nokoaitā.

Akiki nokoxō nō anā manatiroma māmāi nō ōikī.

²⁶ Nāskarifiakī Epa Niospa āfe Yōshi Sharapa noko axosharafafāini. Afeskaxō nō Epa Nios kīfisharatiromē nōkai tāpiama. Akka āfe Yōshi Shara nō mēra nanexō noko shināmanaino nō kīfisharatiro. Noko noikī noko kīfixoni. Noko kīfixonai keskarakai tsōarikai kīfitiroma. ²⁷ Āfe Yōshi Sharapa shināi keskara Epa Niospa tāpikōia. Keyokōi nōko shinā mērari nō shināi keskara tāpikōia. Epa Niospa noko amapaiyai keskara nānori āfe Yōshi Sharapa a chanīmara faafo tii ato kīfixomis.

Jesúsxō nō keyokōi finōkōitiro

²⁸ Akka nō tāpia Epa Niospa noko katoni a apaiyai keskara nō anō. Nō Epa Nios noiaino afarafāfe noko afeskarafafaino afoxō Epa Niospa noko axosharai. ²⁹ Nō Jesús Ifofayoamano Epa Niospa tāpiyoni fatofomākī a chanīmara faifo. Akka chanīmara fayoafoamano shināni iskafakī: “Nafo ēfe Fake keskara ē ato imaxii,” ixō shināyoni. Niospa āfe Fake iyoa Jesús. Nāskaxri nōri āfe fake chipoko ixii. ³⁰ Tāpiyoni nō āfe fakefo ixinō. Askano nōko shinā mēraxō noko yoini: “Ēfe Fake chanīmara fakāfe,” noko fani. Fatora anori yoixō ato chaka soaxoni isharanōfo, afaa chakafamisma keskara ato ōixii, ato chaka soaxonano āfe Fake sharakōi keskara inōfo.

³¹ Noko askasharafaino ħnō fakiri yoitiromē? Epa Niospa noko sharafakōinaino afara chakafāfe noko chakafamatiroma. ³² Epa Niospa noko noikī āfe Fake Jesús timamania noko naxonō. Nāskanixakī noko axosharatiro nā apaiyai keskara nō anō. ³³ Epa Niospa noko katoni

nō afe yora inō. Nāskaxō nōko chaka noko soaxonano afara chakafamisma keskara noko ōixiki. Askano fetsafāfe mī chakara noko faifono nō ato ifofaima. ³⁴ Jesucristo noko nāxokē Āpa otofani. Iskaratīa Apa Nios ika ano ika Apa feta ato keyokōi ĩkinā. Epa Nios noko kīfixōfāfāini. Nā chanīmakōikē tsōa, “Mī afara chakafamiski. Nāskax mī omiskōipakenaka,” noko tsōa fatiroma. ³⁵ Tsōakai Jesucristo nomakinoa potatiroma noko noiyamanō. Nō omiskōikāi, nōko shinā mēra fekaxtekāi, nō Jesúsnoa yoiaito noko omiskōimafāi, noko fonāimafāi, nō rapati yopafāi, noko mesemafāi noko retepafāi, keyokōi afāfekāi Cristo nomakinoa potatirofoma noko noiyamanō. ³⁶ Niospa meka yoikī David kirika keneni iskafakī:

Epa Nios, pena tii mīōxō noko retepaikani. Nō oveja keskara. Ifāfe nā oveja itipinīfasharai retexiki. Nāskarifiakī a mīōxō noko chakafaifāfe noko retepaitirofo,

ixō kirika keneni. ³⁷ Noko askafafiaifono keyokōi nā chakafo nō finōkōitiro Jesús noko noiaino. ³⁸⁻³⁹ Jesucristo nōko Ifonokai afanā Epa Nios nomakinoa potatiroma anā noko noinōma. Nā ě chanīmara fakōini. Epa Niospa noko noiaino afanā noko afeska fatiroma anā noko noinōma. Nō nafiakēkai nomakinoa afanā Nios potatiroma. Nō niyoanori nomakinoa tsōa paxkatiroma. Āfe ājirifāferikai nomakinoa paxkatirofoma. Yōshi chakafāferikai nomakinoa paxkatirofoma. Afarafo iskaratīa ikaifāferikai nomakinoa paxkatirofoma. Inōpokoaiifāferikai nomakinoa paxkatirofoma. Afara chakafāfe āto xānifofofāferikai nomakinoa paxkatirofoma. Nā

nai ari ikafãfe, mai ano ikafãferikai nomakinoa paxkatirofoma. Epa Niospa nõko Ifo Jesucristoxõ noko noi. Nãskakẽ keyokõi onifanifãferikai nomakinoa paxkatirofoma anã noko noinõma.

9

Niospa judeofo katonî afe yora inõfo

¹ Ë Cristo fe rafexõ ã mato mẽstekõi yoi. Ë mato pãraima. Niospa Yõshi Shara ã mẽra naneano ãfe shinãmã shinãkĩ chanĩma ã mato yoi. ² Ë mato yoi iskafakĩ, ãfe kaifo atirito Cristo Ifofaaafoma. Nãskakẽ ãfe shinã mẽra ã atoõnoax omiskõi kakaini. Ë ato shinãkõikĩ finamis afomãî efe yorafokẽ. ³ Nãskakẽ ã shinãmis iskafakĩ: “Epa Niospa, ãfe kaifo nã israelifo ã ato axopai fenoyamanõfo, mefe nipaxanõfo omiskõipakenakafo mẽra fonõfoma. Nãskaxõ Cristo makinoa ea potãfe ato potakima ã ato omiskõixonõ afo omiskõipakexanõfoma. Nã ã fichipai ãfe kaifo judeofo Cristo fe ãpaxanõfo,” ixõ ã shinãmis. ⁴ Nõ judeofo, Jacobo ãfe fenafo. Epa Niospa noko ifini ãfe fakefo nõ inõ. Nãa Nios sharafinãkõixõ nõko kaifo israelifo ato õimapaoni. “Ë mato afara sharafaxõikai. Cristo nã oxiai judeokõi ixii. Aõxõ ã mato sharafaxõikai,” ixõ Niospa yoini. Nãskara Moisés Niospa meka yoikĩ israelifo ato kirika kenexoni nikanõfo. Nãskaxõ ato tãpimani afeskaxõ Nios kãfitirofomãki ichanãxõ. Nãskata afara sharakõi ato axoxiai keskara ato yoiyoni. ⁵ Judeofãfe xinifãfe Epa Nios Ifofasharapaonifo. Cristori judeo fake kãini, Niospa Fakekõifiax. Nãskax arifi nõko xinifãfe ãto fena. Nãfi yorafãfe ãto Ifokĩ, nãatomãî keyokõi

ato ĩkikē. Nāskakē, “Nios fāsi finasharakōia,” nō fapaxanō. Askapainō.

⁶ Epa Niospa noko yoisharayoni keskara jude-
 ofo atirito chanĩmara fayamafiaifono āfe meka
 chanĩmakōi. Afe yorafo yoiyoni keskara axii. “Nā
 judeofa Israelifāfe āto fenafo ē katoa efe yora
 inōfo,” ixō Niospa yoini. Askafafiano atirito
 Nios chanĩmara famisfoma. Nāskakē afe yorakōi
 keskara Niospa ato ōima. ⁷ Nāskarifiakakĩ Abraham
 apaoni keska fakĩ āfe fena atirifāfe Nios chanĩmara
 famisfoma. Afokai Niospa yorakōifoma. Akka
 Niospa Abraham yoini iskafakĩ: “Mĩ fakekōichi
 Isaaca āfe fakefo mĩ fenakōifo ixii, mĩ fake fet-
 safāfe āto fakefori mĩ fenakōifo ixii,” ixō yoini.
⁸ Nāskano nō tāpitiro Abraham āfe fenafo atiri āfe
 fakekōifo Niospa ato ōima. Akka Niospa Abraham
 yoiyoni āfe āfinĩ Sara fake fixiai. “Nā fakefi mĩ
 fakekōi ixii. Mĩ fakē āfe fakefori mĩ fenakōifo
 ixii,” fani. Nā yoini keskara Abraham Nios
 chanĩmara fani. Nā Abraham Nios chanĩmara
 fai keskafakĩri Nios chanĩmara faifono nāfofi
 Niospa fakekōifoki. ⁹ Abraham āfe āfinĩ Sara
 fake naneamatai Epa Niospa yoiyoni iskafakĩ:
 “Xinia fētsa ē anā mikiki nokoxii. Nāskano
 mĩ āfi Sara fake kāixii feronāfake,” ixō
 Niospa Abraham yoini.

¹⁰ Nāskata Sara āfe fake kāini. Nāskaxō
 aneni, Isaaca fakĩ. Nāskakē nā Isaaca nōko
 xini. Isaaca naetapaxō Rebeca fini āfe āfi
 inō. Rebeca fake rafe naneni. Nā fake rafeta
 āto apakōi Isaaca ipaoni. ¹¹⁻¹² Rebeca
 fake kāini fake rafe naneax. Esau kāi
 taeni. Chipa Jacobo ini. Akka kāiyoafomano
 tsōa tāpiyonima fatoto shara shināimākai,
 fatotori chaka shināimākai. Nāskano
 Niospa fisti katonni afe yora

inõ. Kãiyofomano Niospa ãto afa yoiyoni iskafakĩ: “Mĩ fake chipokoto ãfe ochi yonomaxii,” fani. Akka Niospa nã apaiyai keskara fatiro, yorafãfe apaiyai keskara Niospa faima. Askano nõ tâpitiro Niospa a inõpokoai keskara shinãyoni nãskarakõi aki. ¹³ Nãskara Niospa meka yõra kirikaki keneni iskafakĩ: “Ë Jacobo ifipai efe yora inõ. Esáú ã fichipaima,” fani.

¹⁴ Nãskakẽ çiskara nõ yoitiromẽ, “Niospa mã fake fisti katoa kãiyofomano, afaa chakafayoafomano fisti mã katoa akka fetsa katoama õixoma. Nãskakẽ Niospa shinãsharaima,” ixõ nõ shinãtiromẽ? Maa, anori nõ shinãtiroma. Akka Niospa tâpisharakõia. Nã apaiyai keskara fatiro. Nã fichipaiyai katotiro. ¹⁵ Niospa Moisés yoini iskafakĩ: “Nã ã axopaiyai ã axosharaikai. Nãskarifiakĩ nã ã noipaiyai ã noisharaikai,” ixõ Niospa yoini. ¹⁶ Askatari nõ Nios nikasharatama nõakõi nõ afe yora ishara-paiyaito askara noko axõima. Askatamaroko Niospa noko noikĩ noko ifitiro afe yora nõ inõ, nãatomãi noko õiti tâpikaxõ. Nãskaxõ noko noikĩ nã apaiyai keskara shara axõi. ¹⁷ Moisés kirika keneni iskafakĩ: “Epa Niospa Egipto anoa ãto xanĩfo yoini iskafakĩ: ‘Ë mia xanĩfo imapaikĩ ã mia xanĩfo imani mĩoxõ nã maitio ikafãfe tâpinõfo ã afama mĩshti faito. Akka mĩ afara chakafaito ã mia potai mĩ anã xanĩfo inõma. Ë mia askafaito õikakĩ eõnoa ato yoitirofo nã maitio ikafãfe: “Nios tsoa keskarama ãfe shinãõxõ mã Faraón pota,” ixõ eõnoa yoitirofo,’ ixõ Niospa Faraón yoini.” ¹⁸ Akka shinãkapo. Nã Niospa ato noipaiyai ato noikĩ axosharatiro. Nãskarifiakĩ fẽtsa afara chakafakĩ xateamano Niospa ãfe õiti nikayospakõi imatiro

afaa shināpaiyamai keskara imatiro.

¹⁹ Nāskakē fētsa shinātiro iskafakī: “¿Afeskakī Niospa noko yoitromē afara chakafamisfora fakī? Akka nāato noko amai nā apaiyai keskarafakī. Nāskakē noko omiskōimatiroma nō nikayospaito,” ixō fētsa yoitiro. ²⁰ Askafayamafe. ¿Afeskakī mī Epa Nios kemapaimē? Mīfi yoraki. Aafi Nioski nā apaiyai keskara atiro. Akka a Niospa onifatokai yoikī iskafatiroma: “¿Afeskafakī mī ea iskara onifaamē?” ixō yoitiro. ²¹ Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iskafatiroma: “¿Afeskakī mī ea iskara faamē?” ixō yoitiro.

²² Nāskarifiakī Epa Niospa keyokōi yorafo onifafixō atiri ato potatiro āfe meka nikakaspaifāfe. Fenāmāshta ato yoiyofiaito nikayospamisfo. Nāskakē anā teneima, mā atoki ōitifishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe. ²³ Akka nōfi ato keskarama. Noko Niospa noikī noko tāpimamis. Nāskatari noko itipinīsharafamai inimakōikai nō nai mēra shara afe ĩpaxanō. Noko askafamakī yorafo ōimani nā noiaifo Niospa ato noikōia. ²⁴ Noko judeofo fisti Niospa katonima nō afe ĩpaxanō. Akka judeofomafori ato katonī. ²⁵ Nānori Oseas Niospa meka yoikī kirikaki keneni iskafakī:

Fetsafo judeofomari ē katoxii efe yorafori inōfo. “Ē mato noi,” ē ato yoiyamafikatsaxakī, ē ato yoixii iskafakī: “Ē mato noikōi,” ixō Epa Niospa yoini keskara Oseas kirikaki keneni. ²⁶ Askata anā keneni iskafakī:

Niospa judeofoma ato iskafani: “Mā kai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakī: “Nafo Niospa fakefo. Epa Nios finakōia afama mīshti fatiro,” ixō yoixikani. ²⁷ Isaías israelifoōnoa yoini iskafakī: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarīfai judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakī. ²⁸ Nāskaxō nā yoiyoni keskara nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo,” ixō Isaías yoini. ²⁹ Isaías yoiyoni keskara nāskakōi. Nāskata anā yoini iskafakī:

Nōko Ifo finasharakōia nōko fenafo fetsafo ifini afe ĩpaxanōfo. Askafayamafiano anā judeofo ikeranama. Akka nō nai keyokerana Sodoma anoa fe Gomorra anoafu ini keskai, ixō Isaías kirika keneni.

Nā judeofoma na meka shara Jesúsnoa Pablo ato yoini

³⁰ Nāskakē ē mato yoi. Nā judeofomafāfe shināyonifoma iskafakakī: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki. ³¹ Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakī: “A Moisés keneni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiroma ato shara ōixiki. ³² ¿Afeskakī Niospa ato shara ōimamē?

Ë mato yoinõ. Afãfekairoko Jesucristo chanĩmara faifono ato chaka soaxopanã. Askatamaroko Moisés ato yoini keskaraõnoax isharapaikĩ ãto chaka soapaikani Niospa ato shara õinõ. Akka Moisés yoinioxõ Niospa ato chaka soaxotiroma. Ë mato afara fetsa anã yoinõ. Tokiri fai nẽxpakĩa rakano finõpai akiki nõ otisikainãi nõ paketiro. Nãskarifiakĩ Jesús finõpaiyaifãfe chanĩmara fakanima afe nĩpãxakakĩma. Akka nã yorafo oa nõ tokiriki otisikai paketiro keskarafo. Nãskakĩ Jesús finõpaikakĩ shinãchakatirofo. Akka tsõa Jesús finõtiroma. ³³ Nãnori Isaías Niospa meka yoikĩ kirika keneyoni iskafakĩ:

Nikakapo, judeofãfe ãto pexe rasi ano Niospa tokiri keskara nĩchixii yorafo akiki otisikĩ shinãchakaxinõfo. Nã tokiri efapaki yorafo otisikani paketirofo. Akka nãskarari nã Jesucristo chanĩmara faafo tiikai paketirofoma. Anã shinãchakakanima, ixõ Jesúsnoa Isaías kirika keneni. Akka Jesús nã tokiri efapa keskarakõi.

10

¹ Efe yora mĩshtichi, ãfe kaifo ã shinãkĩ finakõi. Ë ato Nios kĩfixõfafãini Jesús chanĩmara fanõfo, Nios fe ãpaxanõfo. ² Mẽ tãpia nãfãfe Epa Nios tãpisharapaikani. Nãskafikakĩ a Niospa ato tãpimapaiyai keskara shinãkanima. ãa ãto shinãmã fisti shinãxõ akani. ³ Jesúsxõ Epa Niospa ãto chaka ato soaxotiro afaa chakafamisfoma keskara ato õixiki. Akka nã Jesús ato chaka soaxotiro nikakaspakani. ãakõi shinãkanax shara

ipaikani. ⁴ Iskakakī shinākani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākani. Akka Moisés kenenioxō nōko chaka nōa nō soame-tiroma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakī nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ipaxakī. Nāskakī nō Cristo fisti Ifofatiro. Nō anā Moisés keneni nikatiroma.

Jesús yorafoōnoax ato nāxoni

⁵ Moisés kirika kenekī iskafani: “Epa Niospa noko yoini keskara ē kirika keneni. Fatora fētsa nā meka ifo sharakōi fai isharakōixii, afaa chakafaamax. Akka māfi Nios fe ikōisharapakenakaki. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.” ⁶⁻⁸ Askata anā kirika kenekī iskafani: “Niospa noko yoini afeskax nō shara itiromākī. Nō Cristo chanīmara faito nōko chaka noko soaxotiro afaa chakafamisma keskara noko ōixiki. Nā Cristo meka shara nōko shinā mēra ikakī. Nō aōnoa tāpixō nō ato yoimis. Akka iskara shināyamakāfe: ‘¿Tsoa nai mēra katiromē Cristo fotomaxiki nō chanīmara fanō?’ Akka tsoakai nai mēra katiroma Cristo fotomaxiki. Askatari iskafakī shināyamakāfe: ‘¿Afeskaxō mā Cristo naafianikē mai mēranoa nō ifitiromē?’ ixō shināyamakāfe. Akka iskaratīa Niospa meka nō mēra ikakī,” ixō kirikaki Moisés keneni. Nānori nō mato yoimis. ⁹ Akka, “Jesús ēfe Ifoki,” nō ato fakī nō shinātiro iskafakī: “Chanīma, Jesús nafianikē

Apa Niospa otofani,” ixõ nõ shinãito nõko chaka noko soaxotiro nõ afe ìpaxanõ. ¹⁰ Akka nõko shinã mēraxõ nõ chanĩmara fakē Epa Niospa nõko chaka noko soaxotiro afaa chakafamisma keskara noko õixiki. Askatari, “Jesucristo ēfe Ifoki,” ixõ nõ ato yoiax nõ afe ipanaka.

¹¹ Nānori Niospa meka yoikĩ yōra kirika keneni iskafakĩ: “A Jesucristo Ifofakanax anã āto ifo fetsa fenakanima. Cristo fistichi ato nimasharatiro afe ìpaxanõfo,” ixõ kirikaki keneni. ¹² Judeofo feta judeofomafāferi Cristo chanĩmara faifono āto Ifo itiro. Niospa ato õia nã yora fisti keskarafo, nāskarafos ato õi. Nāskaxõ fatotora yōkaito Niospa axosharakõifafāini aõ noikõikĩ. ¹³ Nānorikõi Joel yoikĩ kirika keneni iskafakĩ: “Fatotora nõko Ifo chanĩmara faxõ yoikĩ iskafaito: ‘Mĩ ēfe Ifoki, ea ifife ēfe chaka ea soaxoxiki,’ faito āfe chaka soaxotiro afe ìpaxanõ,” ixõ Joel kirika keneni.

¹⁴ Akka tsõa Jesús Ifofaxoma, “Ea ifife ēfe chaka ea soaxoxiki,” ixõ tsõa yōkatiroma chanĩmara faxoma. Akka Jesúsnoa nikakatsaxakĩma afeska faxõ chanĩmara fatirofoma. Tsõakairoko Jesúsnoa ato yoimiskē nikapanāfāfe. ¹⁵ Akka Niospa ato nĩchiyamaino tsoa katiroma Niospa meka shara ato yoixikakĩ. Ākai fotirofoma. Nānori Isaías kirika keneni iskafakĩ: “A meka shara yoi feai sharakõi,” ixõ yoini.

¹⁶ Ē mato yoinõ Niospa mã yorafo nĩchini Cristoõnoa meka shara ato yoitanõfo. Niospa meka yoisharafiaifono judeofo atirifāfe ato nikapaikanima. Nānori Isaías kirika keneni iskafakĩ: “Ēfe Ifāfe, nõ ato yoiaito tsõa chanĩmara

faima,” ixõ yoini. ¹⁷ Nãskano Cristoõnoa meka shara yoiaito nikakakĩ fetsafãfe chanĩmara fatirofo.

¹⁸ “Akka, ¿judeofãfe nã meka shara Jesúsnoa nikamisfomamẽ?” ixõ fẽtsa ea yõkaito, ã kematiro iskafakĩ: “Ëje, mã nikamisfo.” Nãnori David yoini kirika kenekĩ iskafakĩ:

Nã maifo tii anoafãferi nã meka shara mã keyokõichi nikamisfo,

ixõ David kirika keneni. ¹⁹ Mã shinãiraka iskafakĩ: “Akka judeofãfe na meka shara Jesúsnoa mã nikafikakĩ nikasharamisfomara,” ixõ mã shinãirakikã. Akka ã mato yoi iskafakĩ, mã nikamisfo nã meka shara Jesúsnoa. Mẽxotaima mã nikafikakĩ chanĩmara faafoma. Akka israelifomafãfe Nios nikakatsaxakakĩma mã rama aõnoa nikafo. Moisés Niospa meka yoikĩ kirika keneni iskafakĩ:

Nã judeofoma efe yora iyopaonifoma. Akka iskaratĩa ã ato noikõikĩ ã ato ifi efe yora inõfo. Ë ato askafaito õikakĩ judeofãfe ato noikas-paxikani ato xĩtipaikakĩ. Askatari, “Na judeofomafãfe afaa tãpiafoma, judeofãfe ato fafiaifono ã ato ifi efe yora inõfo. Nãskakanax judeofo atoki õitifishkixikani,” ixõ Niospa yoini,

ixõ Moisés kirika keneni. ²⁰ Chipõ Isaíasri Niospa meka yoikĩ kirikaki keneni iskafakĩ:

A judeofomafãfe akõi ea fenayamafikatsaxakakĩ chipõ ea fichixõ ea chanĩmara fakanax efe ipanakafo. Askatari, “Niosnoa noko tãpimafe,” ixõ ato yoiyamafikatsaxakakĩ. Akka chipõ ã ato tãpimaxii,

ixõ Niospa yoini keskara Isaías keneni.

²¹ Askafiaifono ãfe kaifoõnoa Niospa yoini iskafakĩ:

“Nā pena tiixō āto shinā mēraxō ē ato yoimis iskafakī: ‘Ekeki fekāfe,’ ixō ē ato shināmafiaino ekeki fepaikanima. Nikayospamisfo,” ixō Niospa yoini keskara Isaías kirika keneni.

11

Niospa israelifo noikōi

¹ Mā iskafakī shināiraka: “Epa Niospa afe yorafo israelifo mā pota,” ixō mā shināiraka. Mā askaito ē mato kematiro iskafakī: “Maa, ato keyokōi potama. Nāskaxō eari potama ēri israeli. Akka Abraham fe Benjamín ēfe xini. Nāskax ē israelikē ea Niospa potama,” ixō ē mato kematiro. ² Epa Niospa afe yora inōpokoai fo israelifo ato katoyonixakīkai ato potamisma. Shinākapo. Nōko xini Elías israelifoōnoa yoikī kirika keneni iskafakī: ³ “Ēfe Ifāfe, a mī meka shara yoimisfo mā ato retemisfo. Askatari a mīsa kamakixō mia kīfimisfo mā potafo. Iskaratīa ē fistichi mia Ifofai. Anā ano tsoama. Eari retepaikani,” ixō Elías Nios yoini. ⁴ Nāskafaito nikakī Epa Niospa ¿afaa fanimē, Elías? Iskafakī kemani: “Maa. Meres fistikai mī ea chanīmara faima. Akka nāno mī kaifo siete mil yorafāfe ea chanīmara fakaxō afaa fetsakai ifofaafoma. Akka yorafāfe onifanifo āfe ane Baal, ‘Akai nōko niosra,’ famisfoma,” ixō Niospa Elías yoini. ⁵ Nāskarifiakī iskaratīari ēfe kaifo fisti rasichi mā Nios Ifofaafo, Niospamāi afetiama ato noikī ato katoyonino afe yora inōfo. ⁶ Niospa noko noikōisharakī noko ifi nō afe yora inō. Akka nō afara sharafaōxokai noko ifima. Niospa noko afaa kopi yōkaima noko ifixiki. Akka āakōi noko ifi noko noisharakī. Nāskakē nō afara sharafatiroma

noko ifinõ. Akka a nõ kopifa keskara noko õikĩ ãakõi noko ifikeranama. Nãskakẽ noko afaa kopi yõkaima ãakõimãi noko ifixõ.

⁷ Akka ěfe kaifo israelifo fisti rasichi Nios fe-napaonifo afe rafexikakĩ, nãfomãi Niospa katoyonino afe yora inõfo. Akka israeli fetsafãfe Nios nikakaspapaonifo Nios fe rafekaspakakĩ. Akka a Nios nikakaspafãfe ãto õiti kerexkõifakaxõ nikakaspakani. ⁸ Nãnori Niospa meka kirika kenekakĩ iskafanifo: “Epa Nios nikakaspakani nã oxafõ keskarafõ afaa shinãkanima. Askatari oa yora fẽxo keskara ipaikani. Nãskaxõ Nios nikakõipakanima. Askafafãfe Epa Niospa ãfe meka shara ato tãpimanima. Iskaratũari nãskakani,” ixõ yõra kirikaki keneni. ⁹ Askatari David kirika keneni iskafakĩ:

A Nios nikakaspafãfe shinãkani iskafakakĩ: “A nõ piã ichapa ita nõko afama mĩshtifori ichapa. Nãskakẽ Niospa noko shara õi,” ixõ shinãkani, Nios nikayamafikakĩ. Akka nõko afama mĩshtiõxõ Niospa noko shara õima nõ afe ĩpaxanõ. A Nios nikakaspafõ ãto afama mĩshtiõnoax fenoxikani afama mĩshtifo shinãifãfe. Niospa ato omiskõimaxii. ¹⁰ Oa yora fẽxo keskara inõfo. Askarafãfe Nios nikayamaifono oa yora afara efekõi pefea keskara Niospa ato imanõ, ixõ David kirika keneni a Nios nikakaspafõnoa yoikĩ.

Judeofomafãferi Jesũs chanĩmara fakanax afe ipanakafo

¹¹ Akka, ěNiospa afe yorafõ israelifo ato potapak-enakamẽ? Maa, ato keyokõi potaima. Akka nã

israelifāfe Cristo chanĩmara famisfomano a israelimafāferi mā Jesucristo chanĩmara fakani. Ifofaifono Niospa ato ifi afe yora inõfo. Akka nã israelifomafāfe mā Cristo chanĩmara faifono israelifāfe ato õikakĩ akairi Jesucristo chanĩmara fapaikani afe ipaxakakĩ. ¹² Ĕfe kaifāfe, afara chakafamisfo Jesucristo Ifofapaimisfoma. Akka Epa Niospa nã maitio anoafõ Jesucristoõnoa ato tãpimanano chanĩmara fakanax afe ipanakafõ. Nãskaxõ Niospa ato shara faxõi, inimakõinõfo. Askatari Ĕfe kaifo judeofāferi chipo Jesucristo chanĩmara fakanax inimai finakõixikani Niospa ato sharafaxõano.

¹³ Akka mā Ĕfe kaifoyamafiano Epa Niospa ea mato mēra nĩchini Jesúsnoa Ĕ mato yoinõ. Ĕ inimakõi Epa Niospa ea katonĩ Ĕ mato ano onõ. ¹⁴ Ĕ mato yoiaino mā Cristo chanĩmara fayana mā inimakõiaito mato õikakĩ Ĕfe kaifāferi Jesucristo chanĩmara fapaikani, mato keskara ipaikakĩ. Nãskarakõi ipainõfora. ¹⁵ Shinãkapo. Ĕfe kaifo judeofāfe Jesucristo chanĩmara fayamaifono Niospa ato potani anã afe yorakõi inõfoma. Akka nã maifo tii anoafāfe Cristo chanĩmara fakanax Nios fe rafekani. Nãskakē Ĕfe kaifāferi Cristo chanĩmara faifono Niospa anã ato ifi afe yora inõfo. Nãskakanax sharakõi ixikani. Nã yora naax otoa keskara itirofo, inimakõikani. ¹⁶ Nãskaxõ Ĕ anã mato yoinõ pãakiri keparanãkĩ iskafakĩ: Pãa kaxke pishta Niosnã ikano keyokõi āfenã itiro. Nãskatari ifi āfe tapo āfenã ikano āfe teshpafori keyokõi Niosnã itiro. Nãskarifiakĩ Ĕfe kaifāfe Jesucristo chanĩmara fakakĩ taefanifo fisti rasichi. Nãskakē āto fenafāfe Nios Ifofakanax chipo afe yora ixikani chanĩmara fakanax.

17 Ë mato afara fetsa anã yoinõ mã täpinõ. Ëfe kaifo judeofo ifi olivo ãfe põya keskarrafo. Nã ifi põya fimiona ifãfe mextexõ potatiro. Nãskaxõ ifi olivo fetsa nã nii mëra nia ãfe põya fetsa fïaxõ tichixotiro nã olivo kayakõiki. Nãskarifiakĩ judeofãfe Jesucristo chanĩmara fayamaito Niospa mã ato pota. Akka mã judeofoma. Mãfi nã ifi olivo nii mëra nia keskarafokĩ. Nã ifi ifoyama keskarrafo, mã. Nãskax mã Epa Niospa yora ipaonima. Akka Jesucristo mã Ifofaito Niospa mato ifi afe yora mã inõ. Nãskata nã ifi olivo mã ãfe põya tichiax ãfe tapo mëranoax yosiaino foaisharatiro. Nãskarifiakĩ nã judeofãfe ãto xinifãfe mekaõxõ mã Niosnoa täpisharakõiafo nã ifi olivo yosiai keskaraxõ. 18 Iskara shinãyamakãfe: “Nõ sharakë noko Niospa ifia. Akka judeofo chakafokë Niospa mã ato pota,” iyamakãfe. Shinãkapo. Mãfi ifi ãfe põya keskarrafo. Ifi põyakai ãfe tapomais nitiro, xanatiro. Ifi põyafõ aõ tapoõnoax nia. Nãskarifiakĩ judeofo ãto xinifãfe Nios täpinifo tae-fakakĩ. Atoõxõ mãri Nios täpitiro.

19 Mã shinãiraka iskakĩ: “Ifi põya chakakë, ifãfe mextexõ põtatiro. Nãskarifiakĩ judeofãfe Jesucristo chanĩmara fayamaifono Niospa ato potani. Akka nõ judeofo keskarama nõ Jesucristo chanĩmara faax nõ afe ipanaka,” ixõ mã shinãiraka. 20 Nã mã yoiai keskara chanĩmakõikĩ kexemesharakãfe. Akka judeofãfe chanĩmara fayamaifãfe Epa Niospa ato potani. Nã judeofo potani keskafakĩ Epa Niospa matori potatiroki. Kexemesharakãfe, mã anã Jesús chanĩmara fayamaito matori potatiroki. Nãskakë kakapaiyamakãfe. Mã Jesús chanĩmara

fayamax mā fenotiroki. ²¹ Judeofāfe Nios chanīmara fakī taefafianifono chipo āto fenafāfe chanīmara fayamaifāfe Niospa ato potani. Māri mā chanīmara fayamaito matori potatiroki.

²² Akka shinākapo. Niospa noko nofiaino nō nikayamaino noko tāpimatiro omiskōimakī. Nāskakē judeofāfe chanīmara fayamaifāfe ato omiskōimakī ato potai. Akka Niospa mato noikī afe yora mato imai. Nāskakē mato noiai keskara shināfafāikāfe. Chanīmara fafafāikāfe. Mā askafayamaino matori potatiro. ²³ Ēfe kaifo judeofāfe anā chaka shinākakima, Jesús chanīmara faifono anā afe yora Epa Niospa ato imatiro. Ifi mextexō anā āfe pōya tichixotiro anā foainō. Nāskarifiakī Epa Niospa anā ato ifitiro afe yora inōfo. ²⁴ Mā kai judeofoma. Judeofo ifi olivokōi keskarafo. Akka mā judeoma. Mā nā olivo nii mēra nia keskara. Olivokōi āfe ifāfe nā nii mēra olivo āfe pōya xatexō olivokōiki tichitiro foaisharanō. Nāskarifiāi mā Niospa yora ipaonima. Akka iskaratīa Epa Niospa mato ifia mā afe yorafo inō. Nāskakēri ēfe kaifo anā Niospa ato ifipaisharakī ifitiro afe yora inōfo. Jesús chanīmara faifāfe afe yorafo ato imatiro.

Epa Niospa judeofo anā ato ifixii afe yora inōfo

²⁵ Efe yora mīshtichi, māfi israelifoma. Meka fet-saōnoa mā nikamisma ē mato tāpimanō mātō shinā mēraxō mā shinānō, nā ē mato yoiai keskara mā tāpiax kakapaimis mā inōma, mā iskanōma: “Nō israelifo keskarama, nō sharafinakōia,” mā inōma. Chanīma, iskaratīa ēfe kaifo israelifāfe āto ōiti

kerexkõixõ Niospa meka shara Jesúsnoa nikakas-pakani. Akka israelifãfema Jesús chanĩmara faafono Niospa ato ifini afe yora ato imaxii. Nãskatari ěfe kaifãferi anã Nios chanĩmara faifãfe Niospa anã ato ifixii afe yora inõfo. ²⁶ Akka keyokõichi israelifãfe Jesús chanĩmara faifãfe Epa Niospa ato ifixii afe yora inõfo. Nãnori Isaías kirika keneni iskafakĩ:

Nõko Ifo Siõn anoax oxii nõko chaka noko soaxoxiki nõ afe ĩpaxanõ. Nã nõko Ifo israeli yora ixii. Nãato israelifo ifiyoi anã afara chaka ãto ifo inõma,
ixõ Isaías kirika keneni. ²⁷ Askata Isaías Niospa meka anã yoini iskafakĩ:

Ĕ ato yoyoni keskara ĩ ãto chaka ato soaxoxii, ixõ Niospa yoini Isaías kirikaki keneni.

²⁸ Jesúsnoa meka shara judeofãfe nikakas-pakani, noikaspakakĩ. Akka mã judeoma. Nãskakẽ Epa Niospa mato sharafaxõa ãfe meka shara Jesúsnoa mã chanĩmara fanõ. Akka judeofãfe ãto xinifo Niospa yoini iskafakĩ: “Ĕ mato ifi mã efe yora inõ,” ixõ ato yoini. Nãskakẽ ãto xinifoõxõ Niospa ato noi, ãfe fenãfori noikõi. ²⁹ Epa Niospa ěfe kaifo ãfe afama mĩshti inãxixakĩ yoyoni keskara anã fetsafaima afetĩamamãi ato ifiyonixakĩ. Nãskakĩ ato potapakenakama. ³⁰ Akka mã judeoyamafixõ mã Epa Nios nikayopaonima. Akka iskaratĩa mã anã nikayospa ipaima. Nãskakẽ Niospa mato sharafaxopai mã chanĩmara faito. Akka ěfe kaifo judeofo ato sharafaxopaifiaito nikakaspapaonifo. Nãskakẽ mã chanĩmara faito Epa Niospa mato noikĩ mato sharafaxõi. ³¹ Nã mã Nios nikakaspayopaoni keskakani ěfe kaifofo.

Nāskafiaifono nã mato noiai keskari fakĩ atori Niospa noikõi. Nāskakẽ chipo Epa Nios anã shinãxikani. ³² Epa Niospa yoini tãpixõ iskafakĩ: “Yora keyokõichi chakafamisfo, nikayospafo,” ixõ yoini. Askafiaifono ato noikĩ ato chaka soaxoxii afe ĩpaxanõfo.

Nios sharafinakõia

³³ ¡Aicho! ¡Nõko Nios sharakõi! Afama mĩshti tãpikõia. Shinãsharakõia. Āfe shinã mēraxõ yorafoõnoa shinãi keskara tsõa tãpitiroma. Aato akai keskara tsõa tãpitiroma. ³⁴ Tsõa nõko Ifãfe shinãi keskara tãpitiroma. Tsõarikai nõko Ifo tãpimatiroma. ³⁵ Tsõarikai nõko Ifo afaa inãma noko niminõ. ³⁶ Ares āfe shinãmã shinãxõ afama mĩshti onifani. Keyokõi āfenã. Aõnoax nipanaka. Nāskakẽ, “Nios sharakõira,” fapanakafo. Askapainõ.

12

Afeska Niospa āfe yonomati nõ itiomãkĩ

¹ Efe yora mĩshtichi, ě mato yoisharapaiyai keskara akãfe. Epa Niospa mato noikĩ mato sharafamiski. Nāskakẽ mãri inãmekãfe mãto Ifo inõ, āfe yonomati ĩpaxakakĩ. Mã askaino anã afara chaka mãto ifo itiro, Nios mãto Ifo iki. Shinãkapo. Mã mēste shinãsharakõikĩ Nios noiyanã sharafakãfe. Mã askafaino Nios matoki inimakõitiro. ² Nios Ifofaafãfema shinãi keskara shinãyamakãfe. Mã shinãpaoni keskara anã shinãyamakãfe. Iskaratĩa Niospa mãto shinã mēra fetsafapaiyai keskara shinãkãfe. Afaa fetsakai mã shinãtiro. Mã askakĩ mã tãpitiro Niospa mato

imapaiyai keskara sharafinakōi. Mato imapaiyai keskara mā ikaino matoki inimatiro.

³ Epa Niospa ea noikī ea yoia ē mato tāpimanō. Nāskakē ē keyokōi mato yoisharapai. Kakapaimis iyamakāfe. Niospa mato imapaiyai keskara fisti shinākāfe. Afaa fetsa shināyamakāfe. Niospa mato shināmana keskara fisti matoōnoa shinākāfe. Mēstekōi matoōnoa shinākāfe. Mā Nios chanīmara fakī shinākāfe iskakī: “Ea Niospa imapaiyai keskara ē ipai,” ixō shinākāfe. ⁴ Ē mato afara fetsa ēa yoipai. Nōko yora fistifiano nō pōyayai fetsea. Askata nō feroyata, pachoyata, nā nō fisti askai fetsea. Nāskaxō nāfāfe nō afara fetsafo atiro. ⁵ Nāskarifiai nōko Ifo Cristo fistikōi. Akka nōfi āfe pōya keskarata, āfe fero keskarata, āfe tae keskarata nō iki fetsea yora fisti fiax.

⁶ Epa Niospa noko amapaiyai keskara nō aōxō fetsafo axosharatiro. Mā nō Nios Ifofaano a noko imapaiyai keskara noko imaketsai fētsa āfe meka ato yoinōfo, fētsari ato tāpimanō, fētsari afaamaisfori ato inānō. Nāskarafo noko imaketsai. Mā nō Nios Ifofaano noko noikī noko katoa noko amai keskara nō anō. Noko fetsafo katoa āfe shināōxō fetsafori āfe meka nō ato yoinō. Nāskakē mā mato katoano mā chanīmara faxō mato yoiai keskara fetsafori ato yoisharakāfe. ⁷ Mā mato fetsafo katokē āfe shināōxō fetsafori axosharafafāikāfe. Mato fetsafo katokē āfe shināōxō āfe meka ato tāpimasharakāfe. ⁸ Mato fetsafo katokē aōxō fetsafo ōiti ato fepeaxōfafāikāfe. Mato fetsafo katokē afara yopaifo inimayanā ato ināsharakāfe. Mato fetsafo katokē āto xanīfo mā inō. Nāskakē Niospa shināmana keskara ato yonomasharakāfe. Xanīfo mēsteshara ikāfe. Nā mato katokē āfe shināōxō

omiskōiaifo ato noikī inimayanã ato axosharakãfe.

Afeskax Nios Ifofaafō itirofomē

⁹ “Ē mato noira,” ifiata ato pārayamakãfe. Yorafo noikōikãfe. Afara chakafo noikaspakãfe. Afara shara noisharakãfe. Afo potayamakãfe. ¹⁰ Nã mã Nios chanīmara faafo tii noinãkãfe. Mato fe yorakōifo fe mã noinãmis keskariai noinõnãkãfe. A mã mã nōimeai keskariai fetsafori ato noisharakãfe. “Fetsafo finakōiaki, ě finakōiyamaki,” ixõ ato sharafakãfe. ¹¹ Nõko Ifo yonoxoni xaniyamakãfe. Niospa Yõshi Sharaõxõ inimakãi yonosharaxokãfe. ¹² Epa Niospa mato sharafaxoxiai keskara shinãkãfe. Nãfo shinãi inimakãfe. Akka omiskōifi fena fenayamakãfe. Epa Nios kīfikī xateyamakãfe. ¹³ Nios Ifofaafãfe afara yopaifono ato inãkãfe. Fetsafo pimasharakãfe. Pexe yopaifãfe mãto pexe mēra ato ikimakãfe. Ato kexesharakãfe.

¹⁴ Mato omiskōimanaifãfe ato kopiyamakãfe. Nios kīfikãfe iskafakī: “Epa Niospa ato chakafayamafe ato sharafafe,” ixõ Epa Nios kīfikãfe. Nãskaxori ato ĩchayamakãfe. Askatamaroko ato sharafaxokãfe. ¹⁵ Inimaifono mãri inimakãfe. Ato sharafaifono aõnoax inimakãfe. Oiaifono mãri shinãmitsayanã ato shinãkãfe. Omiskōiaifono mãri atoõnoax omiskōikãfe. ¹⁶ Afe feratenãkakīma Epa Niospa mato shinãmapaiyai keskara fisti anori shinãkãfe. “Ē ato keskarama,” iyamakãfe. Xanīfofo fisti fe rafepaimis iyamakãfe. Afaayamafo feri rafekãfe. “Ē tãpia keskarakai fetsafãfe tãpiafoma,” ixõ anori shinãyamakãfe. Kakapaiyamakãfe.

¹⁷ Mato chakafafiaifãfe ato kopiyamakãfe. Āto ferotaifi isharakãfe, “Nios chakara,”

fayamanõ. ¹⁸ Keyokõi yorafo fe rafepaisharakãfe. Mã aska sharafapaifiaino fetsafo mato fe rafesharapaikanima. ¹⁹ Efe yora mĩshtichi, fẽtsa mato chakafafiaito ato kopiyamakãfe. Epa Niospa meka yoikakĩ kenenifo iskafakakĩ: “Mato chakafaifo ã ato omiskõïmanikai,” ixõ kirika kenenifo. Epa Niospa yora chakafo ato omiskõïmaxii. Mãkai ato omiskõïmatiroma. ²⁰ Ato kopitamaro ko nã mato noikaspaifo fonãikaifãfe ato pimakãfe. Nõamã ikaifãfe ato ayamakãfe. Ma askafaito õikani, “Noko kopikanimara,” ikanax rãfipainõfo. ²¹ Askata fetsafãfe mato chakafapaifiãifãfe mãri kopikiri ato chakafayamakãfe. Chaka ifofayamakãfe. Askatamaroko afara sharafatitaifakãfe. Askafakĩ mã chaka potatiro.

13

Nõ xanĩfofo nikakõitiro

¹ Epa Niospa yoini keskara nã maitio ikafãfe xanĩfofo katotirofo. Akka xanĩfo finakõia nikata afe rafeafori nikakõikãfe Niospa ato xanĩfo imaino. Akka Niospa xanĩfo ato imayamaino itirofoma. ² Niospa noko yoini iskafakĩ: “Mãto xanĩfofo nikakõikãfe.” Akka mãto xanĩfo mã nikakaspakĩ Niosri mã nikakaspai. Mã nikakaspaito mato omiskõïmaxii. ³ Akka nõ isharaxkai nõ xanĩfoki mesetiroma. Akka nõ isharayamax nõ xanĩfoki mesetiro. Xanĩfoki mesexikima isharakãfe. Mã askaito mato chakafatama matoõnoa yoisharanõfo. ⁴ Xanĩfofo Epa Nios yonoxomis keskarafo mato axosharakani. Akka mã afara chakafaax

xanĩfoki mã mesetiro. A xanĩfoafo afokai kaxpa xanĩfoafoma, mato omiskõimatirofo. Nãfofi Niospa õimati keskarafokĩ afara chakafaifãfe ato omiskõimatirofo. ⁵ Akka mãto xanĩfofo nihakõikãfe mato omiskõimayamanõfo. Mãto shinã mēraxõ shinãsharaxikakĩ. Ato nikayamakĩ mã shinãtiro iskafakĩ: “Ooa, ẽ nikayospakõi. Nãskax ẽ shinãmitsaito ẽ mei,” ixõ mã shinãtiro xanĩfofo nikayamax.

⁶ Mãto xanĩfofo Nios yonoxomisfo keskarafõ pena tii mato yonoxokani mã isharanõ. Nãskakē mato kori yõkaifãfe ato inãkãfe aõxõ mato axosharanõfo. ⁷ Mã ato nimixõ ato kori inãkãfe. Askatari ato noisharata ato noisharakãfe.

Nõ nõinõnãtiro

⁸ Tsoa nimiyamakãfe. Askatamaroko noinãkãfe. Noinãi eneyamakãfe. Nã nõ yorafo noiaiõxõ Epa Niospa yoini keskarakõi nõ amis. ⁹ Noko yoikĩ iskafani: “Mãto ãfima fe iyamakãfe. Kērofori mãto fenema ferĩ iyamakãfe. Retemitsapaiyamakãfe. Yometsoyamakãfe. Fetsa pãrayamakãfe. Fetsa fĩapaiyamakãfe,” ixõ noko yoini. Afara fetsafori noko yoini. Nõ yorafo noikĩ na Epa Niospa yoini keskara nõ ato chakafaima. Nãskakē a mãia mã noimei keskari akĩ fetsafo ato noife. ¹⁰ Nõ fet-safo noikõixõ nõ ato chakafatiroma. Akka nõ ato noikõikĩ Niospa yoini keskara nõ aki. Nõ ãto ãfi fe nõ ipaima. Askatari nõ ato noikõixõ nõ atoki yometsoima. Askatari nõ ato pãraima. Akka nõ ato noiaiõxõ Niospa noko yoia keskara nõ atiro.

¹¹ Nã Jesús fena oyoaima chãĩ ẽ taefakĩ Jesús Ifofani. Akka iskaratĩa nõko Ifo Jesús mã chaima oi. Nãskakē ẽ mato yoiai keskara akãfe.

Oxakatsa ikai keskara iyamakāfe. Oxakatsa ikīkai nō yonosharatiroma. Nāskakē xanikakīma Jesús yonosharaxokāfe itipinīsharaxikakī. ¹² Mā penaino samamakōi penatiro. Nāskarifiakakī mā nōko Ifo chaima oaino fakish mēra ika keskara iyamakāfe. Māto chaka xatekōikāfe. Jesús ika keskara māri xafakīa ikāfe afara chakafaxikakima. ¹³ Isharakōikāfe penano nō ōisharatiro pakexikima. Nāskarifiakī Jesús Ifofaax nō isharakōitiro afaa chakafatama. Akka fetsafāfe monokakī afara chakafaifo mēra foyamakāfe. Chaka fetsa fetsatapafao ayamakāfe. Pāeyamakāfe. Askatari māto āfima chotayamakāfe. Kēromāri māto fenema chotamayamakāfe. Afara chaka fetsafo shināyamakāfe. Feratenā faatanāyamakāfe. Fetsa xītipaimis iyamakāfe. ¹⁴ Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

14

Mato fe yorafo a Nios Ifofaafō mekafakī chakafayamakāfe

¹ Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nofe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekafakī chakafayamakāfe. ² Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiro: “Ēfi Jesús chanīmara fakī ēkai nami pitiro. Ē fanafo fisti pitiro,” ixō yoitiro Jesús

meka tãpisharaxoma. ³ Fẽtsafãfe nami pikĩ a nami pimisfoma ato mekafakĩ chakafatiroma. Ato yoikĩ iskafatirofoma: “Mã afaa tãpiama. Nõ nami pia shara, noko chakafatiroma. Nami shara,” ato fatirofoma. Nãskarifiakĩ nã nami pimismato a nami pimisfo ato mekafakĩ chakafatiroma. Ato yoikĩ iskafatiroma: “Nafãfe nami pikakĩ chakafakani,” ixokai atoõnoa yoitirofoma. Akka Epa Niospa keyokõi nãskarafo noko ifi nõ ãfe fakefo inõ. Nãskakẽ fetsafo mekafakĩ chakafayamakãfe. ⁴ Jesús Ifofaafokai mãto inafoma. Akka afãfe Epa Nios yonoxomisfo. Nãskakẽ ato mekafakĩ chakafayamakãfe. Epa Niospa ato yoitiro. A chakafaifo ato iskafatiro: “Mã chakafai,” ixõ ato yoitiro. Askatari a sharafaifo, “Mã sharafai,” ato fatiro. Akka a chaka shinãifo Niospa ato tãpimatiro isharanõfo anã chaka shinãnõfoma.

⁵ Akka a Nios Ifofaafõ fetsafãfe shinãkani iskafakakĩ: “A judeofãfe tenetitĩa nõ ichanãtiro Jesús shinãi,” ixõ anori shinãkani. Akka fetsafãferi shinãkani iskakakĩ: “Nã pena keyokõi shara nõ ichanãtiro Jesús shinãi,” ixõ shinãkani. Nãskaxõ nã ãto shinãmã shinãifo keskara shara. Nã shinãifo penata ichanãtirofo Jesús shinãkani. Akka mã shinãi keskara shinãyamaifono ato mekafakĩ chakafayamakãfe. ⁶ “Na judeofãfe tenetitĩa nõ ichanãtiro Jesús shinãi,” ixõ shinãifãfe, nãfãfe nõko Ifo Jesús Ifofasharapaikani. Akka a nã fatora penata nõ ichanãtiro Jesús shinãi ikaifãferi, nãfãfe nõko Ifo Jesús Ifofasharapaikani. Askatari fetsafãfe shinãkani: “Nõ nami pitiro. Aicho, Epa Niospa mĩ noko nami inã nõ pinõ,” ixõ shinãkani. Nãfãferi nõko Ifo Jesús Ifofasharapaikani. Akka

fetsafāferi nã nami piyamaifāfe nãfāferi nōko Ifo Jesús, “Aicho,” fatirofo. Nãskaxō nãfāfe Nios shināsharapaikani. ⁷⁻⁸ Nō niyoxōkai nōa nō apaiyai keskara fisti nō shinātiroma. Epa Niospa noko amapaiyai keskara nō shinātiro. Nōfi āfenāfoki. Nāfi nōko Ifokĩ. A nō naitĩari nōko Ifo Jesús niyoxō nō Ifofasharapai nokoki inimanō. A nō naitĩari nōko Ifo nō shinātiro nōmāi āfenākōixō.

⁹ Cristo noko nāxoni. Mā maifafono otokainixakĩ. Iskaratĩa mā nia. Nãskakē nō nayoamax nōko Ifo iki. Mā nō naaxri nōko Ifo ixii. ¹⁰ ¿Afeskafakĩ mato feta chanĩmara faafo mā mekafakĩ chakafaimē? ¿Afeskafakĩ mā fetsaōnoa mā shināchakaimē? “Aakai afaamara,” ixō mā shināi. Shinākapo, keyokōi nō chipo Nios ikano nō akiki nokoi kaikai. Askatari noko yoixii nō afara sharafayamakē nō chakafamiskē. ¹¹ Isaías Niospa meka yoikĩ kirika keneni.

Niospa yoini iskafakĩ: “Chanĩmakōi ē nia. Chanĩmakōiri keyokōi maifo tii anoafō ekeki nokoxikani. Ekeki ratokonō mai chachikaxō yoixikani: ‘Epa Niospa, mĩ chanĩmakōi, mĩ Nioskōi,’ ixō ea keyokōichi yoixikani.”

¹² Akka keyokōichi Epa Niospa ferotaifi nō amis keskara nō yoixii. Nō shināmis keskarari nō yoixii.

Fetsafo afara chakafamayamakāfe

¹³ Nãskakē a mato feta Jesús chanĩmara faafo mekafakĩ chakafayamakāfe. Iskafakĩ shinākāfe: “Nō afara chakafaito ōikaxō akairi chakafatirofo. Nãskakē nō afaa chakafapaima akairi afaa chakafayamanōfo.” ¹⁴ Jesús ēfe Ifokē ē mato yoisharapai. Keyokōi a nō piaifo shara nō pitiro. Nã ē chanĩmara fakōini. Nãskafiano

fetsafāfe shinākani iskafakakī: “Na piaifo nō pixō nō chaka shinātiro,” ixō shinākani. “Nō nami pitiroma,” ixō shināfikakī mā nami pikani. Nāskaxō chaka shinākani. ¹⁵ Mato feta fētsa Jesús chanīmara faito āfe ferotaifi a nami pitiroma piyamakāfe āfe shinā mēraxō shināchakanōma. A noikōixō mā āfe ferotaifi pitiroma. Nōko Ifo Cristo aōnoaxri nani. Nāskakē a pitiroma pikī mā fetsa shināchakamatiro. Nāskakē āfe ferotaifi piyamakāfe Jesús kachikiri faax fenoyamanō. ¹⁶ “A ē akai keskara chakama,” ixō mā shināfiaino fetsafāfe askara shinākanima. Iskafakī shinākani: “Na mā akai keskara chaka,” mato faifono mā xaterisafatiro matoxō shināchakayamanōfo. ¹⁷ A nō piaito Niospa yora noko imatiroma. Askatari a nō ayaito Niospa yora noko imatiroma. Akka Nios nōko xanīfokōino āfe Yōshi Sharaōnoax nō sharakōi. Nōko ōiti fekaxteima nō inimakōitiro. ¹⁸ Nōko Ifo Cristo nō nikasharaino Epa Nios nokoki inimasharatiro. Yorafāferi nokoōnoa shināsharatirofo.

¹⁹ Nāskakē Jesús chanīmara fai fetsafo fe isharakōikāfe. Jesúsnoa yoinōnākāfe a keskara shara ixikakī. ²⁰ Niospa yoini keyokōi a nō piai shara. Nāskafekē fetsafāfe, a Nios tāpisharafāfema shinākani iskafakakī: “Afara fetsa nō pixō nō chakafai,” ixō shināifono āto ferotaifi afara piyamakāfe. Akka mā āto ferotaifi piaino mato ōikakī āto shinā mēra shināchakatirofo. Nāskaxō anā Jesús Ifofasharatirofoma. ²¹ Mā nami piaito fetsafāfe mato ōikī shināchakatirofo. Nāskaxō anā Jesús Ifofatirofoma. Nāskakē āto ferotaifi afaa piyamakāfe. Askatari mā māmā ayaito ōikakī fetsafāfe shināchakatirofo. Nāskaxō anā Jesús

Ifofatirofoma. Nāskakē anā ayayamakāfe. Afara fetsafori akī mā ato shināchakamatiro, nāskakē xatekāfe Jesús Ifofanōfo. ²² Nāskaxō mā shināi keskara mares shinākāfe. Epa Nios fisti mā yoitiro. Mā Nios chanīmara faxō māto shinā mēra shināsharakī mā iskafatiro: “Chanīma, ē akai keskara chakama,” ixō shinākī māto shinā mēra mā inimatiro. ²³ Nāskaxō fētsa Niospa meka tāpisharaxoma shinātiro iskafakī: “Nafo pikī ē chakafairakaiti,” ixō shināfikī akairi pikī chakafatiro. Afara fetsafori shinākī iskafakī: “Nafo akī ē chakafairakaiti,” ixō shinākī akairi akī chakafatiro.

15

Nā mā apaiyai keskara fatama fētsa apaia keskara axokāfe

¹⁻² Jesús chanīmara fakōixō a Niospa meka tāpisharafoma nō ato fenāmāshta yoitiro ato fe feratenātama. Nōa nō apaiyai keskara fisti nō atiroma. Nā Jesús chanīmara faa fetsafori noikī nō ato axotiro āto shinā mēra inimamakī shara inōfo Jesús Ifo sharafakōinōfo. ³ Shinākapo. Nōko Ifo Cristo aafi apaiyai keskara fisti shināpaonima. Aōnoa Nios yoimisto kirika keneni iskafakī: “Epa, ē mia nikakōia. Akka mia chakafakakī eari chakafakani,” ixō kirika keneni Cristoōnoa yoikī. ⁴ Niospa meka kenepakenifo noko tāpimaxikakī. Āfe meka nō chanīmara faxō afara chaka finōkōixō nō tenekōinō. Āfe mekaōxō nōko ōiti nō fepeaxō nō tāpitiro nōko Ifo fe nai mēra chipo nō afe ipanaka anā afara chakapa noko omiskōimanōma. ⁵ Noko afara chakapa afeskarafafiaito Epa Niospa noko

mitsisfamatiro nō tenenō nōko ōiti fepeaxokī. Nāskakē mā Jesús Ifofasharaino mato nānori fisti shināmati. ⁶ Nāskakē nōko Ifo Jesucristo āfe Apa nō yoisharai. Nāskax nā meka fistipa nō mekai keskarakōi Epa Nios yoisharakī nā yora fisti keskara.

Niospa meka shara judeofoma yoinifo

⁷ Cristo nokoki inimakī noko ifini afe yorafa nō inō. Nāskakē māri fetsafo fe yōra faatanākāfe. Mā askaino Niosnoa shināsharatirofo. ⁸ Ē mato yoinō Jesucristo mai ano oni judeofo ato yonoxomis keskara ikiyoi. Niospa nōko xinifo yoiyoni keskara Cristo oni. Nāskakē Niospa nōko xinifo yoini keskara chanīmakōikē nō tāpitiro. ⁹ Akka judeofomaōnoaxri Jesús oni. Nāfāferi chanīmara faxō yoixikani iskafakakī: “Aicho, Epa Niospa noko noikī āfe Fake nokoki nīchini. Epa Nios shara,” ixō yoixikani. Nānori David kirika keneni iskafakī:

Epa Niosi, ē mīōnoa ato yoisharaxii, a judeofoma. Ē mia fanāki, “Aicho, Nios shara,” ē mia faxii, ixō kirika keneni. ¹⁰ Anā Niospa meka yoikī kirika keneni iskafakī:

Judeofoma nā judeofo fe inima faatanākāfe. Māri ato fe Niospa yora ixii, ixō kirika keneni. ¹¹ Anā kirika keneni iskafakī:

Maitio anoafāfe, nōko Ifoōnoa yoisharakāfe. Keyokōi nā maifo tii ikafāfe nōko Ifo fanākāfe, ixō kirika keneni. ¹² Isaías aatori iskafakī kirika keneni:

Nōko xini Isai āfe fena na maitio ikafāfe āto xanīfo ixii. Shināxikani iskafakakī: “Nā fistichi

Nios ika ano noko ifitiro nõ afe ãpaxanõ, nõ anã nanakama,” ixõ shinãxikani, ixõ Isaiás kirika keneni Cristoõnoa yoikĩ.

¹³ Epa Nios chanĩmara faxõ nõko Ifo oxiano nõ manai. Epa Niospa noko shinãmani iskafakĩ: “Chanĩma, nõko Ifo oxii noko ifixiki nõ afe ãpaxanõ,” ixõ noko shinãmani. Nãskakẽ ẽ mato kĩfixomis Niospa mato inimamanõ. Askatari mãto shinã mẽra mato shinãmasharai mã afeskatama mã isharanõ mato axosharai. Mã Nios chanĩmara faano ãfe Yõshi Sharapa mato axosharai mã isharanõ.

Pablo Jesucristoõnoa judeofoma ato yoini

¹⁴ Efe yora mĩshtichi, mẽ tãpia mã noinã faatanãito Jesúsnoa mã tãpisharai mã yoinõnãsharatiro. ¹⁵⁻¹⁶ Niospa ea noikĩ ea katonĩ Jesucristo ãfe yonomati ẽ inõ, ãfe meka shara ẽ mato tãpimanõ. Nãskakẽ ẽ ranotama anã aõnoa ẽ mato shinãmasharai kirika kenekĩ. Akka Niospa ea nĩchini judeofoma ẽ ato Jesús Ifofamanõ. Mã Jesús Ifo sharafaxõ, mãto chaka mã soax a keskara shara mã inõ. Nãskax Epa Nios matoki inimakõi.

¹⁷ Nãskakẽ ẽ inimakõi nõko Ifo Jesucristomãi ea katonikẽ Epa Nios ẽ yonoxonõ judeofoma Niospa meka ẽ ato yoinõ. ¹⁸ Ëa ẽ ato yoima. Cristo ea shinãmanaino ẽ ato yoimis. Nãskakẽ a ẽ ato yoimis keskara Epa Niosnoa nikakõimisfo. ¹⁹ ãfe Yõshi Sharapa ea shinãmanaino a tsõa atiroma keskara ẽ ato õimana. Nã maitio Jerusalén anoafõ yoita Ilírico anoafõri ẽ ato yoini. Keyokõi mã meka shara Cristoõnoa ẽ ato yoifofãsafamis. ²⁰ Ëkai a yora fetsafãfe Cristoõnoa yoimisfo ari ẽ kapaimisma. A Cristoõnoa nikamisfoma ano ẽ kapaimis ato

tāpimaxiki. ²¹ Nānori Isaías Niospa meka keneni iskafakī:

Tsōa aōnoa nikayomisma chipo nikakaxō
tāpinōfo,
ixō keneni.

Pablo Roma ano kapaikī shināni

²² Akka ē mato ari kapaimis. Ē mato ōikapaifi ē kamisma. Afara fētsa ea katimafamis. ²³ Nāskafixō iskaratīa Jesúsnoa mē ato yoikī mē mitoa. Nāskax mē itipinā mato ari kaxiki. Mē xini ichapa amis mato ōikapaikī. Mēxotaima ē mato ari kapaimis. ²⁴ Ē España ari kai ē mato ano nēteyoxii mato fe mekaxiki nō yoinōnāsharaxiki. Mato anoax ē kaito a ē yopai ea ināxikāfe ē España ari nokosharanō. ²⁵ Akka iskaratīa ē Jerusalén ano kayoikai. Jesús chanīmara faafāfe ea nīchikani a Jerusalén anoxō Jesús chanīmara faafo ē ato kori inānō. ²⁶ Macedonia anoxō a Jesús chanīmara faafāfe Jerusalén anoafō a Jesús chanīmara faafo ato kori ināpainifo. Acaya anoxori Jesús chanīmara fakaxō ato kori ināpainifo a afaamaisfo. Nāskakē ea kori inānifo ē ato inātanō. ²⁷ Inimayanā ato ināpaikakī ato yoinifo iskafakakī: “Jerusalén anoax Jesúsnoa yoimisfo nokoki fenifo Jesúsnoa meka shara noko yoi fekani. Akka nokoki feyamanifono na meka shara nō nikakeranama. Nāskaxō nō afarayaxō nō ato ināpai ato sharafakī,” ixō yoinifo. ²⁸ Nāskata ē ato kori ināfainikai Jerusalén anoax España ari kakī. Nāskaxori ē Roma anoa ē mato ōifainikai. ²⁹ Mē tāpia ē mato ano nokoxō nōko Ifoxō ē mato yoisharaxii mātō shinā mēra mā inimanō.

³⁰ Efe yora mīshtichi, meka fetsari ě mato yoipai. Mā nōko Ifo Jesucristo noixō āfe Yōshi Sharaōxō ea noikāfe. Ea Nios kīfixokāfe ě yonosharaxonō afanā ea afeska fanōma. ³¹ Ea kīfixokāfe Epa Niospa ea kexenō Judea anoafāfe a Jesús chanīmara faafāfema ea afeska fanōfoma. Ea kīfixokāfe a Jesús chanīmara faifo Jerusalén anoafō ě ato kori ināino inimakōikai finōfo. ³² Mē ato inākī mitoano Epa Niospa ea nīchiano ě inimayanā matoki nokoxinō. Nāskata nō yoinōnāsharaxinō nōko ōiti mēra inimayanā. ³³ Epa Nios mato fe inō. Akka Niospa noko imasharatiro nō isharanō.

16

Pablo ato meka fomani

¹⁻² Nofe yora Febe, Cencrea anoax matoki nokokē sharafakāfe. Nā kēromā nōko Ifo Ifofasharakōimis. Cencrea anoxō a Nios Ifofaafo ato sharafaxomis. Yora fetsafori ato afara yopaito axokāfe.

³ Aquila āfe āfi Prisca nā rafe efeta Jesucristo yonosharaxomisfo. Ea ato yoisharaxokāfe.

⁴ Yorafāfe ea retepaiyaifāfe nā rafeta ea kexesharamisfo ea reteyamanōfo. Ĕfe kaifomari nā Jesús chanīmara faafāfe ichanākaxō yoimisfo iskafakī: “Aquila yafi Prisca nō atoki inimasharakōi,” ixō yoimisfo. ⁵ Āto pexe anoaxri ichanākaxō ea ato yoisharaxokāfe. Efe yorakōiri Epeneto ea yoisharaxokāfe. Nāatofi Asia anoxō Cristo chanīmara fakī taefaniki. ⁶ Mariāri mato yonosharaxomiski aari ea yoisharaxokāfe. ⁷ Efe yora raferi Andrónico yafi Junias ea ato yoisharaxokāfe. Nā rafe efe karaxa mēra ikinifo.

A Jesúsnoa yoimisfāfe a rafeōnoa yoisharamisfo. Ë Jesucristo chanĩmara famatai nã rafeta chanĩmara fakĩ taefanifo.

⁸ Ampliatori ã noishara nãatomãi nõko Ifo Ifofasharakõiaito. Aari ea yoisharaxokãfe.

⁹ Urbano efeta Jesucristo yonoxomis. Nãrifi ea yoisharaxokãfe. Efe yorashtari Estaquis nãri ea yoisharaxokãfe. ¹⁰ Apeles feronãfake sharakõi.

Epa Nios akiki inimamis. Nãatori Jesucristo yonosharaxomis. Nãri ea yoisharaxokãfe. Aristóbulo yafi afe yorafori ea ato yoisharaxokãfe.

¹¹ Efe yorashtari Herodiõn ea yoisharaxokãfe. Narciso yafi afe yorafãferi nõko Ifo chanĩmara faafo, afori ea ato yoisharaxokãfe. ¹² Trifena yafi Trifosari ea ato yoisharaxokãfe.

Nã kãero rafeta nõko Ifo yonosharaxomisfo. Nofe yora Pérsidari ea yoisharaxokãfe. Nã kãromãri nõko Ifo yonosharaxomiski. ¹³ Nõko Ifãfe Rufori katoni afe yora inõ. Nã Rufo ãfe afa ãfe efakõi keskara. Ea kexesharamis. Nã raferi ea ato yoisharaxokãfe.

¹⁴ Asíncrito ikaino Flegonte ikaino Hermas ikaino Patrobas ikaino Hermes ikaino nãfãfe nõko Ifo chanĩmara faafo. A fetsafãferi nõko Ifo chanĩmara fakanax ato fe ikafori ea ato yoisharaxokãfe.

¹⁵ Filólogo ikaino Julia ikaino Nereo ikaino ãfe poi Olimpas ikaino keyokõi a nõko Ifo chanĩmara fakanax ato fe ikafori ea ato yoisharaxokãfe.

¹⁶ Keyokõi ichanãkanax yoinõnã faatanãsharakãfe noinõnãsharaxikakĩ. Nã maitio ikafãfe a Cristo Ifofaafãfe mato yoisharapaikani.

¹⁷ Efe yora mĩshtichi, ã mato yoinõ nikakapo. Mato fe ichanãmis fetsafãfe mato afara chakafamapaikani anã mã Jesúsnoa shinãnõma.

Akka nõ mato mēstekōi tãpimanai keskara nãfãfe mato anori yoikanima. Akka fakirira mato yoipaikani anã mã Jesús shinãnõma. Nãskax ato fe rafeyamakãfe, mato pãratirofokĩ. ¹⁸ Afãfekai nõko Ifo Cristoõxõ yoimisfoma. Nãfãfe afara fipaiyaifo fistis shinãmisfo. Niospa meka tãpisharafoma ãto meka fistiõxõ ato pãrapaikani ato anorima shinãmaxikakĩ. ¹⁹ Keyokõichi mã nikafo nõko Ifo mã Ifofasharakõikē. Nãskakē ē matoki inimakõini. Afara sharafoõnoa tãpikõikãfe. Mã afara chakaõnoa tãpiyamakãfe. Afoõnoa shinãyamakãfe. ²⁰ Epa Niospa mato imasharatiro mã isharanõ. Nãato Satanás mato nãmã potai anã mato afeskafanõma. Nõko Ifo Jesucristo mato sharafaxopainõ.

²¹ Nã Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nãfãferi mato mekashara fomakani. Nãfo efe yorakõifo.

²² Nã Terciori mato mekashara fomai. Nãato ea kirika kenexona.

²³ Gayopa pexe mēra ē ikē ea kexemis. Jesús chanĩmara faa fetsafori Gayopa pexe mēranoax ichanãmisfo. Nãfãferi mato mekashara fomakani. Na Erasto pexe rasi anoa ato kori kexexomisto mato mekashara fomai. Askatari nofe yora fetsari Cuarto nãatori mato mekashara fomai.

²⁴ Nõko Ifo Jesucristo mato noikĩ mato sharafanõ. Askapainõ.

Mã ato yoikĩ enekĩ Niosnoa ato yoisharani

²⁵⁻²⁶ Epa Niospa mato kexesharanõ. Ë Jesucristoõnoa mato yoimis keskara ãfe shinãmã mato shinãmatiro mã Ifofasharanõ. A iyopaonifãfekai

tsõa Jesucristoõnoa tãpiyopaonifoma. Akka iskaratĩa keyokõichi mã tãpiafo. Epa Niospa nã nipanakato noko nĩchini Jesucristoõnoa nõ ato yoinõ. A ix-iainoa Epa Niospa ato yoini nãnorikõi kirika keniffo. Nã maitio ikafãfe Jesús chanĩmara fayanã nikasharatirofo.

²⁷ Nõko Ifo Jesucristoxõ keyokõichi Niosnoa yoisharapakenakafo. Nõko Nios fistichi keyokõi tãpikõia. Askapainõ.

Nã tii ã mato yoi.

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

6c7b7ce2-9d87-5405-91e6-71ce1387adcc